

懷寧縣志卷十四

名宦傳

漢桓寬字次公汝南人治公羊春秋昭帝始元六年詔郡國舉賢良文學之士問以民所疾苦皆請罷鹽鐵權酷母與天下爭利然後教化可興與御史大夫桑宏羊等建議相詰難於是罷權酷而鹽鐵終不變至宣帝時寬乃推衍其意爲鹽鐵論凡六十篇篇各標目實則反覆辨難諸篇皆首尾相屬雖其說不用於當世亦足以究治亂成一家之言寬固賈董之亞匹矣應舉爲郎仕至廬江郡丞漢書無傳故著之云

何武字君公蜀郡郫縣人宣帝時舉賢良方正徵對策拜爲諫大夫遷揚州刺史所部二千石有罪應時舉奏每行部必先卽學宮見諸生試其誦論問以得失然後入傳舍出記問墾田頃畝五穀美惡已迺見二千石以爲常九江太守戴聖以私憾毀武於朝其子賓客爲羣盜得繫廬江聖自以子必死武平心決之得免聖慚服初武爲郡吏太守何壽甚厚之後壽爲大司農其兄子爲廬江長史時武奏事在邸壽兄子適在長安壽爲具召武弟顯酒酣見其兄子欲以屬武武曰刺史古方伯上所委任一州表率職在進善退惡不可有所私歲中廬江太守舉之其守法見憚如此所居無赫赫名而去常見思

見前漢書

劉馥字元穎沛國相人建安初爲揚州刺史單車造合肥空城

建立州治數年中恩化大行百姓樂其政流民越江山而歸者以萬數於是聚諸生立學校廣屯田興治芍陂七門吳塘諸竭以溉稻田官民有蓄至今爲用

見三國志

王景字仲通樂浪訥邯人沈深多技藝章帝時爲廬江太守先時百姓不知牛耕致地力有餘而食常不足景乃驅率吏民修起廢蕪教用犁耕由是墾闢倍多境內豐給遂銘石刻誓令民知常禁又訓令蠶織爲作法制皆著於鄉亭廬江傳其文辭卒

於官

見後漢書

羊續太山平陽人桓帝時爲廬江太守揚州黃巾賊攻舒焚燒城郭續發縣中男子二十以上皆持兵勒陳其小弱者悉使負

懷寧縣志

卷十四 名宦

一一

水灌火會集數萬人並執力戰大破之郡界平後安豐賊戴風等作亂續復擊破之斬首三千餘級生獲渠帥其餘黨輩原爲平民賦與佃器使就農業中平二年遷南陽太守

見後漢書

陸康吳人靈帝時徵拜議郎會廬江賊黃穰等與江夏蠻連結十萬餘人攻沒四縣拜康廬江太守康申明賞罰擊破穰等餘黨悉降袁術屯兵壽春遣使求委輸兵甲康以其叛逆閉門不通內修戰備將以禦之術遣其將孫策攻康圍城數重康固守

受敵二年城陷月餘發病卒

見後漢書

晉華譚字令思廣陵人刺史嵇紹舉秀才至洛陽對策九州秀孝無逮譚者素以才學爲東土所推由鄆城令爲廬江尋除尙

書郎再遷廬江內史加綏遠將軍討平石冰之黨陸珪等及其都督孟徐以功封都亭侯在郡政嚴而與上司多忤元帝時著書三十卷名曰辨道上牋進之卒贈光祿大夫

見晉書

唐張鎮周舒人武德五年自壽州都督移舒州都督始入舒就故宅召親戚與之酣飲散髮箕踞如布衣時凡十日既而分贈金帛泣與之別曰今日鎮周猶得與故人歡飲明日則舒州都督治百姓耳諸公禮隔不得復爲交遊自是親故犯法一無所

縱境內肅然

見通鑑

張延賞河東蒲州人大歷初爲淮南節度使歲旱民他遷吏禁之延賞曰吏者人恃以活拘此而斃不如適彼而生乃爲具舟

懷寧縣志

卷十四 名宦

三

遣之勅吏爲修室廬已逋責而歸者更增於舊

見唐書

李珏字待價淮陰人宣帝時爲舒州刺史尋遷淮南節度使江淮旱發倉廩賑流民以軍羨儲穀半價與人卒於鎮疾亟時官屬見臥內惟以州有酒稅直而神策軍常爲豪商占利方論奏未見報爲恨一不及家事性寡欲門無餽餉淮南之人德之珏已歿叩闕下願立碑刻其遺愛云

見唐書

獨孤及字至之河南洛陽人天寶末以道舉高第代宗時爲舒州刺史歲饑旱發倉粟賑貸鄰郡逋亡什四以上而舒人獨安

祀名宦

見唐書

湖珣字潤博貝州宗城人早孤能自勤學立節概凡一試進士

二卽吏部選皆以文章占上第貞元中爲舒州刺史舒歲大熟
麥一莖數穗閭里歌舞之祀名宦見唐書

鄭穀滎陽人以水曹郎中出守舒州水旱小沴必齋告山川寶
應秋齊楚蝗將及舒境穀晨興禱於潛山蝗出境退於他邑復

爲風雨飄溺無遺老幼相與歌曰鄰邑穀不登我土豐稔盛禾
稼美如雲實由我使君本府志

李翺字習之隴西人少與張籍皇甫湜從昌黎韓愈遊以文名
傾當世長慶元年由湖州改舒州時淮左遭旱編戶逃亡十去

其六惟舒人樂業作舒州新堂成自作銘尋召守禮部郎瀕行
爲文遣虞候吳潭告辭潛山之神按唐書李翺傳翺爲廬州刺
史時州旱遂疫得翺以安未

爲舒州茲據翺
集仍府志探入

五代吳彭彥章梁貞明五年詔吳楚王錢鏐大舉討淮南鏐使
子傳瓘帥戰艦五百艘自東洲擊吳吳遣舒州刺史彭彥章及
裨將陳汾拒之傳瓘命每船皆載灰豆及沙戰於狼山江吳船
乘風而進傳瓘引舟避之既過自後隨之吳回船與戰傳瓘使
順風揚灰吳人不能開目及船舷相接傳瓘使散沙於己船而
散豆於吳船豆爲戰血所漬吳人踐之皆僵仆傳瓘因縱火焚
吳船吳兵大敗彥章戰甚力兵盡繼之以木身被數十創陳汾
按兵不救彥章知不免遂自殺吳人誅汾籍沒家貲以其半賜
彥章家廩其妻子見通鑑

宋樊知古字仲師本名若水字仲清其先京兆長安人父潛事李景任漢陽石埭二縣令因家池州嘗舉進士不第漁釣采石江上數月乘小舟載絲繩維南岸疾棹抵北岸以度江之廣狹因詣闕上書言江南可取狀以求進用太祖令送學士院賜試本科及第解褐舒州軍事推官方議南征造浮橋濟師江濤險壯恐不能就知古請於石牌口試爲之移至采石三日橋成不差尺寸

見宋史

馮瓚字禮臣齊州歷城人風神俊爽善談論有吏材太祖甚寵之擢拜左諫議大夫出知舒州境內有菰蒲魚鼈之饒居民採以自給防禦使司超盡征之瓚奏奪民利請蠲除從之

見宋史

劉沆字冲之吉州永新人倜儻任氣天聖八年擢進士第二爲大理評事通判舒州有大獄歷歲不決沆數詞決之章獻太后建資聖浮圖內侍張懷信挾詔命督役嚴峻州將至移疾不敢出沆奏罷懷信

見宋史

李炳肥鄉人以殿中侍御史出知舒州太祖征金陵緣淮供億

惟舒尤甚以勞加御史

見宋史李沆傳

舒雅字子正久事李氏江左平爲將作監丞後充秘閣校理好學善屬文與吳淑齊名累遷職方員外郎求出得知舒州仍賜紫金恬於榮宦州之潛山靈仙觀有神仙勝迹郡秩滿卽請掌觀事優游山水吟咏自樂時人美之

見宋史文苑傳

李孝基字伯始幽州人進士高第通判舒州所治雖劇然事來亟斷不爲證左回枉甫日中庭已空矣或問其術曰無他省事耳舒吏受賂鬻獄以殺人罪加平民孝基劾治三日得其情迺

抵吏罪

見宋史

王琪字君玉兒童時已能爲歌詩起進士仁宗時通判舒州歲饑奏發廩救民未報先振以公租守以下皆不聽琪挺身任之琪性孤介不與時合數臨東西名鎮政尙簡靜每疾俗吏飾廚傳以沽名譽故待賓客頗闊略間造飛語起謗終不自恤

見宋史

龜仲參神宗初以通判攝州事言馬當山羅刹磯之險請疏秋浦口樅陽渠以避之

見池州府志藝文

懷寧縣志

卷十四 名宦

六

孫知微高宗時通判舒州淮賊劉忠寇蘄州韓其清逆戰之遂薄舒州知微繕城郭治甲兵力與之抗久而不下及入舒州知微被執義不屈忠怒鬻而食之後朝廷官知微二子夏椅恭帝時爲安慶府通判元祐二年元兵入安慶知府范文虎以城降椅仰藥死明知府胡纘宗建二忠祠合祀焉並祀名宦

游酢字定夫建陽人歷知舒州待僚吏有恩使人樂自盡而無敢慢民戴若父母去久愈見思祀名宦

見宋史

李師中字誠之楚邱人神宗時王韶請置市易募人耕緣邊曠土師中奏阻其謀王安石方主韶議以奏報反覆罪削職知舒州在官不貴威罰務以信服人至明而恕去之日民擁道遮泣

祀名宦並四賢祠

見宋史
道學傳

黃庭堅字魯直洪州分寧人徽宗時知舒州遊潛皖山谷寺石牛洞樂其林泉之勝因號山谷道人云祀名宦

見宋史
文苑傳

喻樗字子才嚴州人性質直好議論少慕伊洛之學登建炎進士往謁趙鼎鼎時罷樞筦居常山一見奇之引爲上客紹興初鼎都督川陝辟爲屬高宗親征鼎以樗言奏起張浚知樞密院事樗自是往來鼎浚間多所裨益久之檜怒樗先言和議非便言者希旨劾爲訕謗出知懷寧轉通判衡州檜死起爲大宗正丞孝宗卽位遷提舉浙東常以治績聞醇熙七年卒祀名宦並

四賢祠

見宋史
道學傳

黃幹字直卿福州閩縣人受學朱子寧宗時知安慶府金人破光州安慶震恐乃請城以備戰守不俟報卽日興工城分十二料先自築一料計其工費若干然後委官吏寓公士人分料主之役民兵五千人人役九十日而計人戶產錢起丁夫通役二萬夫人十日而罷役者更番暑月月休六日日午休一時至秋漸殺其半日以五鼓坐於堂濠砦官入聽命以一日成算授之乃治府事理民訟接賓客閱士卒會僚佐講究邊防利病次則巡城視役晚入書院講論經史築城之杵用錢監未鑄之鐵事畢還之是歲大旱幹祈輒雨或未出晨興登郡閣望潯山再拜雨卽至後二年金人破黃州沙窩諸關淮東西皆震獨安慶按

堵如故繼而霖潦餘月巨浸暴至城屹然無虞舒人德之相謂曰不殘於寇不蹈於水生予者黃父也祀名宦並四賢祠

見宋史道

學傳

吳淵字道父嘉定七年舉進士累官沿江制置副使節制斬黃州安慶屯田使進制置使兼和州無為軍安慶府三郡屯田使凡叛司空山燕家山金剛臺三大砦嵯峨山鷹山什子山等二十二小砦無事則耕有警則禦詔以淵興利除害所列二十有五事究心軍民拜資政殿學士職任如舊封金陵侯進爵為公所至興學養士然政尚嚴酷時有蜈蚣之謠

見宋史

沈煥字叔晦定海人乾道五年舉進士通判舒州閒居雖病猶

不廢讀書拳拳然以母老為念善類凋零為憂卒丞相周必大聞之曰追思立朝不能推賢揚善予愧叔晦益者三友叔晦不

予愧也

見宋史道學傳

馬光祖字華父婺州金華人寶慶二年進士累官至沿江制置使寶祐三年兼節制和州無為軍安慶府三郡屯田使始至官即以前例公用器皿錢二十萬緡支犒軍民減租稅養無告之人招兵置砦維錢助諸軍婚嫁屬縣稅折收絲綿絹帛倚門除免以數萬計興學校禮賢辟屬極一時之選景定二年城安慶詔馬光祖進二秩史稱其政寬猛適宜事存大體張德興建康人宋安撫使也度宗咸淳十年陳奕以黃州降元

端宗景炎二年德興與淮西野人原寨劉源等起兵倡義興復
司空山傅高舉兵應之遂復黃州壽昌奉景炎正朔四月元湖
北宣慰使鄭鼎將兵拒之與德興遇於樊口鼎戰敗死九月元
將昂吉兒襲破司空寨德興與高俱被害元執德興三子以去
見府志按宋史本紀總贊淮民張德興據司空山攻下黃州壽
昌軍旋爲元兵所破亡走元世祖本紀有破司空山殺張德興
執其三子以歸之語昂吉兒傳亦載殺張德興事稱爲舒民俱
未指爲安撫使府志據太湖志探入且祀名宦未詳所出姑仍
其舊以闕
疑焉耳

元韓建字公懋遼西人至正中以宗正郎出守安慶政尙清淨
在官三年穎六盜起所在奇袤之民羣起而從之殺守令據城
邑時太平旣久民不知兵而郡縣無城郭兵備卒然有變吏往

往先盜去城多陷明年冬盜入宿松破太湖潛山吏多徙家江
中爲去計建獨無所徙而治城隍計軍實以示民必守越明年
春盜入桐城以桐人來攻城建縱民出擊盜敗去自春抵秋盜
來攻者十有一大小百餘戰皆敗之盜大忿乃悉衆而東舳艫
數百里鉦鼓之聲動天地王師敗績小孤山十月癸卯盜遂至
北城下城南郭久隳爲民居而聯羣艦爲城盜縱火舟燒聯艦
艦潰火入南門燒民居諸守將亦潰民恐甚走來眠建建方部
署寮吏爲戰守如恒日民乃無恐且戰且撲甲辰盜轉西郭戰
却之明日轉東郭又戰却之相火所經撤民屋材夜柵之旦甲
寅盜力攻無得利諸潰者聞城完且相率來援盜見之乃夜引

去余闕來爲宣慰道聞城陷矣比至乃完問故父老皆曰韓君完我是年盜復大至闕與建率衆殲之盜不來者再期朝廷錄功加建中奉大夫秩從三品及陳友諒陷安慶闕自剄死建舉家被害建病不能興賊執之建罵賊不輟求死甚急賊不殺以戶扇昇去不知所終明郡守胡纘宗訪得遺骸瘞於康濟門外江濱碣其墓建祠於上見大節堂並韓公祠記祀名宦

余闕字廷心一字天心唐兀氏世居武威父沙刺藏卜官合肥遂爲合肥人母尹氏夢異人至生闕闕生髮盡白嗜欲澹甚不知有肉味惟甘六藝學若飴蜜歲環攻之與京兆張亨游

史作張恒

亨臨川吳澄弟子善談文理闕之學因絕出擢元統癸酉進士

第授泗州同知官至浙東廉訪司以事被劾歸隱青陽山至正壬辰天下兵動平章政事脫忽爾不花統戎淮南承制起闕權淮西宣慰副使闕對使者曰爲臣死忠正在今日闕何敢辭乃之官分治安慶安慶距城皆盜柵也闕從間道入推赤心置人腹中復轉桌以哺餓夫民翕然歸四方來依者日衆闕知民可用乃率之破雙港砦闕被甲荷戟直前賊空砦出鬪殺傷相當至日昃賊殊死戰闕不勝退復收散卒誓曰死則死此何生爲一鼓而進大破之諸砦畏威次第降闕益繕城浚濠修戈矛分屯耕郊外田民懼不能者遣軍士護之耕賊來輒與戰一日賊四合旌旗蔽野鼓譟之聲震天地闕縱驍騎數十大喊而出賊

勢披靡遣兵乘之斬首數千級當是時淮東西皆陷唯安慶巋然獨存賊來戰又數敗却之僞作尺牘通城中諸大姓約期日反冀闕捕戮之闕曰我民安有是命悉焚之賊計窮復令闕故人以甘言說降闕命牽出以鐵椎擊碎齒頰斬於東門潛山有虎傷人闕造文檄山神使驅虎虎出境不傷人功上朝廷俾爲眞陞同知淮西宣慰副使都元帥轉淮南行省參知政事尋改左丞賜二品服闕益自奮誓以死報國立旌忠祠以勵將佐時集祠下大聲謂曰男兒生則爲章孝寬死則爲張巡許遠不可爲不義屈意氣慷慨甚丁酉冬寇大集諸部圍城戰艦蔽江而下樵餉路絕兵出數失利戊戌正月七日城陷闕猶率衆巷戰

賊呼曰余將軍何在吾將官之闕戟手罵曰余恨不嚼碎汝肉吐餒烏鳶寧復受汝官邪賊怒舉長鎗欲刺闕闕遂自剄沈水死年五十六其妻蔣氏聞之亦率其子德臣女安安赴水死諸將卒慟曰余將軍不負國我等可負余將軍邪從而死者千餘人朝廷知其忠贈闕淮南行省平章諡曰忠宣

陳寧號止齋江西饒州人世居茆塘宋端平間講學有聲爲眞德秀魏了翁所器重因世亂無意仕進德祐元年元師下饒州寧匿山中伯顏素聞其賢必欲致之乃下令若不得寧卽屠茆塘寧流涕曰奈何因我故而殘鄉里遂出見伯顏起送入京授沁州知州陞安慶同知行府事嫗育喚咻六皖戴爲慈母未幾

乞休去家於桐城桐人稱其所居曰官山子姓蕃衍至今爲官

山陳氏

本府志

李惟肅眞定人元延祐中由郎官佐安慶郡嘗建亭小孤山題曰一柱虞集爲文記之稱其文雅有高才以直道剛氣自持爲時輩所忌人或憤其不足侯不屑也

本府志

帖木補化字拱辰蒙古氏登至正壬午進士授江州瑞昌縣達魯花赤遷安慶路桐城縣達魯花赤時桐城已逼爲敵境民慕義咸欲避地於郡中補化乃就視事而集其民諭告切至民樂爲用既歷歲守帥余闕嘉其賢勞擢以都事贊畫守禦饒有方略城陷與守帥同死之從祀余忠宣公廟

以上文職

李宗可蘄人也爲州判官嘗文身人號爲花李善槩視賊欲吞余闕兄闌以女妻之及來舒命權義兵萬戶統新軍守水砦前後多戰功賊來破城李橫槩入賊中殺死甚衆聞闕死馳馬還其家人勸之降怒曰吾受元帥節制平日甘苦元帥與吾共之元帥已死吾降異日何以見元帥於地下且曰爾等亦當隨吾盡忠無爲人所魚肉乃盡驅之一室大小咸殛殺然後坐取巨觥以飲拔劍自刎而死祀名宦

見賈伯良死節記

陳宗義高安人至正十六年爲安慶路提領慷慨負大節時天完兵屢寇皖左丞余闕令督兵與子顯禦賊於潛東九都坂賊悉衆圍之力戰而死子顯以甲裹父屍葬於殂所身匿智井得

全後遂世爲潛人

本府志以上武職

明王道直字履之別號孺初湖廣漢川人進士崇禎乙亥由河南道授南京都察院右副都御史提督操江時革左諸賊數十部自豫東窺鳳陽南瞰金陵直犯安廬潛太道直甫至卽出巡閱自南京新江口抵江西之彭澤縣凡舊防兵爲遊兵營荻港營安慶營上下九百里卒不過二千船不過百艘其外兵可用者惟新水營奇兵營合之可得千二百人道直增兵勵防隨宜布置裕溪通巢湖蠟磯爲盜藪遣參將鄭夢熊領遊奇一營專防守禦王志領新水舟師在安慶縱陽李陽等處策應未幾賊陷和州欲渡江道直斂江船歸渡口以拒之丙子春募兵得五百人設蕪采營以參將潘可大領之明年正月賊掠楚龍坪乃遣王志帥舟師赴安慶自統勁兵繼發與賊遇於縱陽登陸大戰賊潰而西犯潛山又敗之三月賊復大集攻安慶兵備史可法屯於天寧寺之高岡賊力戰且迫王志馳援賊犇黃州四月復犯太湖參將潘可大等禦於宿松之鄧家店戰歿道直與可法收潰卒安殘民遣哨列防多爲疑陣堵禦於分龍嶺急水溝賊縮退皖民以安而江南不知有寇尋召入爲左都御史掌院事著有中臺奏議吳會疏草嚴關盾墨江流灑赤等集行於世

本府志

彭韶字鳳儀莆田人進士成化二十年擢右副都御史巡撫應

天皖屬久罹兵災田荒而賦不減民多逃竄宿松尤甚詔題免積逋三千餘石蠲除雜派流亡咸集共立祠祀之九月二十二日爲其誕辰官民致祭歲以爲常

本府志

朱瑄四明人右副都御史巡撫應天下車卽搜剔弊政廉得皖屬宿邑魚稅多溢額敲扑追呼民不堪命檄革羨耗並疏請蠲免積逋漁戶得甦謳思不絕

本府志

張國維字玉笥東陽人進士崇禎七年擢右僉都御史巡撫應天安慶等十府其冬流賊犯桐城官軍覆沒國維方壯年一夕鬚髮頓白明年正月率副將許自强赴援賊復攻潯山太湖國維至解桐圍遣守備朱士允趨潯山把總張其威趨太湖士允

戰死自强禦賊宿松殺傷相當安慶山民築石以投賊賊多死乃越英山霍山而遁九月賊復由宿松入潯山太湖他賊掃地王亦陷宿松等三縣國維乃募土著二千人戍之而以兵事屬監軍史可法又明年賊犯懷寧可法及左良玉馬嶺遏之又圍望江遣兵援之解去十年三月國維率副將程龍等赴安慶禦賊鄂家店龍軍數千悉沒賊東陷和州含山定遠攻陷六合遂攻天長國維見賊勢日熾請割安慶池州太平別設巡撫以可法任之安慶不隸江南巡撫自此始國維爲人寬厚得士大夫心屬郡災傷輒爲請命築太湖繁昌二城修堤濬渠並有成績迨南都覆潞王降魯王走台州航海國維還守東陽知勢不可

支作絕命詞三章赴水死見明史

史可法字憲之一字道隣大興籍祥符人母尹氏有身夢文天

祥入其舍生可法舉崇禎戊辰進士八年以右參議分守池州

太平其秋總理侍郎盧象昇大舉討賊改可法副使分巡安慶

池州監江北諸軍黃梅賊掠宿松灩山太湖將犯安慶可法追

擊之灩山天堂寨府志流賊獻曹諸營犯太湖宿松至灩山明可法直前薄之賊犯桐城又拒於北峽關

年十二月賊馬守應合羅汝才李萬慶自鄖陽東下可法馳駐

太湖扼其衝十年正月賊從間道突安慶石牌尋移桐城參將

潘可大擊走賊復為廬鳳軍所扼回桐城掠四境知縣楊爾銘

嬰城守可法與可大勦捕賊走廬江犯灩山可法與左良玉敗

之楓香驛府志丙子冬賊由金橋襲懷境丁丑正月二日可法與賊戰於天井潭賊犯石庫可法又堵於大勝磯二

月賊復至灩山可法以新勇營八百人因壘於天寧寺被圍急操標將王志適來援可法出合戰得其酋賊遁可法復合總兵

左良玉追至太湖賊從英霍下釣臺可法與之夾水而軍又戰於楓香驛賊乃竄灩山太湖山中三

月可大及副將程龍敗歿於宿松賊分其黨搖天動別為一營

而合八營二十餘萬衆分屯桐城之練潭石井陶冲總兵官牟

文綬劉良佐擊敗之挂車河七月擢可法巡撫提督軍務冬部

將汪雲鳳敗賊灩山京軍復連破老回回舒城廬江賊遁入山

時監軍僉事湯開遠善擊賊可法東西馳禦賊稍稍避其鋒可

法短小精悍面黑目爍爍有光廉信與下均勞苦軍行士不飽

不先食未授衣不先御以故得士死力連敗賊英山六合順天

王乞降十二年夏丁外艱去

府志凡七出戰守兩獻歲皆在行間兩則植蓋而立夜則倚梅而坐

霜雪繁隕執事以幕進急命撤去曰吾何忍獨煥也野人以二簋効帝漿適健兒挾賊級至即噉之信賞必罰士卒悅服愛民如子奸猾不少貸丁丑夏陞巡撫事柄歸一迺立三大營摩厲以圖大舉遂駐節六安以遏賊衝己卯丁艱去皖人括跣犇泣如失

服闋起戶部右侍郎尋拜南京兵部尚書福王立拜禮部

尚書東閣大學士仍掌兵部事馬士英督師鳳陽冀入相擁兵

入覲可法遂請督師出鎮淮陽城破自刎不殊一參將擁出小

東門遂被執可法大呼曰我史督師也遂殺之家人舉袍笏招

魂葬於揚州郭外之梅花嶺祀名宦

見明史

鄭二陽河南鄆陵人萬歷己未進士崇禎己卯以揚州兵備召

對稱旨擢安廬巡撫辛巳春賊革里眼等五營大舉於太湖盤

踞數百里監軍楊卓然入營招諭賊因受撫二陽聞報移書戒勿輕信且嚴飭將領枕戈待境上未幾五營果叛去人服其先見時流寇數擾江北二陽設粥廠招流移全活甚衆勅賜金銀車扇以榮之

本府志

黃配元字位兩江西樂安人崇禎甲戌進士初授望江令乙亥

調懷寧丁丑流寇焚掠四野城守戒嚴配元偕士民寢處馨鼓

間周城建敵臺四修余忠宣公舊濠外築牛馬牆繞以木城以

禦賊騎多備礮石為攻守計賊不敢逼辛巳行起授南戶科給

事中未之任擢安慶巡撫配元感激恩遇嚙指籲天誓必殲賊

旋以內艱去中外惜之祀名宦

本府志

張亮四川人舉於鄉崇禎時歷榆林兵備參議用薦改安廬兵備監禁軍討賊頻有功十七年擢右僉都御史巡撫其地福王立之明年左夢庚陷安慶亮被執挾以北行亮乘間赴河死

見明

史袁繼成傳

馮叔吉字修吾浙江慈谿人嘉靖癸丑進士萬曆初以按察副使備安廬徽寧池太六郡軍事倜儻負奇氣所至剔奸摘伏爲民興利剏建屬邑城郭增置沿江戈船選材官分制五嶺諸要害江南巡撫張佳允上其功於朝曰安慶置兵徽州置兵石磯置兵荻港置兵五嶺置兵戈船置兵而千里間無寇盜婺源有城黟縣有城桐城有城望江有城蕪湖有城銅陵有城而六郡

懷寧縣志

卷十四 名宦

十七

鞏若金湯先是佐徽郡練民兵以戢礦賊守池州築清溪以利民涉興學宮理冤獄六郡並祀名宦仕至湖廣布政使後裔多顯者叔吉長於應變尤知人善任蹇達在下僚爲之折節延譽卒爲名宦云

本府志

張九德字曙海浙江慈谿人萬曆辛丑進士按獄江西大司寇頒其讞詞爲天下式守松江賑活饑民數十萬以才望薦擢徽寧安池兵備使時劇盜縱橫浮江穴山千里震動九德勦撫兼施埽空巢窟又分布樓船五里會哨禽斬渠魁餘黨竄村落間乃制十甲爲保十保爲團每保置更樓有警則號鼓齊震迅傳百里援勦邀截無有脫者又就團保選良家子弟兵農隙講武

量功錄用人皆勇公鬪怯私讐舊犯竊盜者編名鄉約所許緝盜自贖除名頒文公家禮大明律例責令團保長家諭戶曉徼富豪健訟必以賄先九德佯諾臨鞫重加箠掠後無敢干以私徼仰食外郡獨有米稅條議得免改北運在民者爲官解請蠲稅契十之五省賦役之煩苛定爲額民便之九德善用兵目光如炬轄甯夏撫延綏多著奇績仕至總河工部尙書著有膽識類纂折獄要編將略等集祀名宦

本府志

湯開遠字伯開一字谷靈江西臨川人顯祖子也早負器識經濟自許萬曆乙丑舉人崇禎五年爲河南府推官十年論平盜功當進秩以王家禎薦擢按察僉事監安廬二郡軍討賊數有

功巡撫史可法薦其治行卓異進秩副使監軍如故十三年與總兵黃得功等大破革里眼諸賊朝議將用爲河南巡撫竟以勞卒軍民咸爲泣下贈太僕少卿有寒光集疏草行世

見明史並府志

杜繩甲四川富順人由鄉薦歷知安慶府仁恕明慎愛民如子書省刑省罰二箴於堂右以于東海楊關西自警甲申聞北都陷擗踊哀號憤不欲生是年轉安廬道江北開藩兵橫放難制繩甲規畫莫展不勝扼腕謝位去皖人哀之

本府志

譚啟宗字敬先知安慶之明年六月寇至鎮卒不戰以潰寇退啟宗倡僚幕撫殘民固守又明年明師三戰陳氏皆大捷友諒中流矢死太祖憫江夏屢困戰鬪不忍加兵命啟宗往諭之或

曰友諒死未知信否不可輕往啓宗曰上命其可避乎奉命趨江夏宣明威德言論慷慨聞者感動厚其禮遇以其官使來復命啓宗乃還安慶

本府志

趙好德河南遂平人洪武初知安慶府時當新造好德一一與民更始凡里役之充力役之征皆嚴約其屬務求平允堂宇帑庾民間戶牒多所剝制子毅官至工部侍郎祀名宦

本舊志

邵彧湖廣應山人國子生歷桂林東昌同知以求賢擢知安慶府蚤夜孳孳勤求治理德性寬厚未嘗疾言遽色以督軍行縣維時勘合行府嚴甚且以人廉之彧從容處分不治一人而事皆辦集偶以事被逮民禱於神冀其平康後事白復還民皆欣

欣然相慰守皖九載三攷績六邑耆民以廉能幹濟政務公勤賦役均平編民樂業具狀詣御史臺表之祀名宦

本舊志

周濟河南洛陽人領鄉薦授監察御史出知安慶府蒞政有方科差有法故事民役以三等九則準之濟易以什伯之法民以爲便郡俗奢靡濟下令婚葬不得踰制民間宴會盛張者廉得之罰如法鑿小池於後圃政暇則幅巾弊衣從二三童子泛艇於池且酌且歌雅有晉人風度但不失於放將九載攷績未及擢用卒於官祀名宦

本舊志

錢性天台人宋錢鏐之後自刑部郎遷知安慶府廉能勤慎志在恤民郡中巡司每爲蘆課所苦性爲處之稍有賴焉祀名宦

本舊志

王璠河南修武人登天順進士歷官戶部主事員外郎出知安慶府德性醇厚器識宏遠外和而內介學行皆有可稱守皖三年不爲華飾偶不悅於當道遂解官去祀名宦

本舊志

陳雲鶚浙江慈谿人登景泰進士歷官刑部主事員外郎擢知安慶府興學養士息詞訟滌冤抑屏盜賊賑水旱政教並舉皖人德之祀名宦

本舊志

周翔字鵬舉浙江慈谿人進士爲監察御史有聲擢知安慶府陛辭上諭之曰知府親民爾其慎重之勿憚御史爲也翔在安慶善於修職政通民和冤抑疏滌督修郡乘卓然可觀

本舊志

懷寧縣志

卷十四 名宦

二十一

徐傑山西大同人進士宏治間知安慶府上疏請祀元守臣韓建於余忠宣公廟上可其議命文學修輯郡乘興學校愛養民力以寬厚稱

本舊志

鍾蕃字廷芳浙江崇德人進士由刑部郎中出知安慶府蕃以嚴爲治有侵官儲者欲泯其姦乃潛於夜投火官舍燬其牘籍蕃心知其人佯禱於神而收縛之曰神告我矣其人果伏罪聞者皆驚吏胥不法民積惡不悛咸寘重典不少貸豪橫斂迹境內肅然七載擢貴州布政司參政復姓潘仕至都察院左都御

史祀名宦

本舊志

張冕字服周直隸長垣人進士由監察御史出知安慶府一洗

宿弊執法不阿郡有某素悍人名以虎某亦以虎自名冕收而
寘之法衆皆悅之以治行高等擢江西布政司參政引疾歸未
抵大用而卒人咸惜之祀名宦本舊志

楊茂元字志仁浙江鄞人登成化進士知安慶府文章政事炳
然可觀甲子旱甚晝禱於山川夜稽顙北辰不雨乃往拜瀟嶽
求所謂龍湫者懇禱之乃大雨歲亦登民懷其德不避權貴公
署多所修葺後陞廣西布政司參政仕至刑部右侍郎祀名宦

本舊志

周洪浙江衢州人宏治庚戌進士由刑部主事員外郎出知安
慶府詳於刑名留心緝盜名宦鄉賢諸祠皆所建置嘗修葺郡

縣學校今縣學書樓之類是也

本舊志

郭維黃巖人登進士授監察御史正德己巳以山東布政司參
政掌順德府事移知安慶府御史嚴正接察寀以至誠未久致
仕去其去也囊橐減於來時至今稱廉吏云祀名宦本舊志

陶煦浙江秀水人宏治庚戌進士正德庚午由監察御史出知
安慶府大興學宮流賊滋擾禦以邊策而民不擾歷三載陞廣

東按察司副使卒

本舊志

張文錦字闔夫山東安邱人

南畿志作遼陽人

宏治己未進士任戶部

主事忤逆瑾被謫瑾誅復爲主事至郎中出知安慶府醇厚深
雅不事烜赫之功正德己卯以扼宸濠有功

事具揚銳傳中又南畿志宸濠來攻

文錦出府庫金懸城上向守備楊銳曰師行號令出於君而信賞係於我銳喜曰戎可以即矣時文錦力疾坐城上以鎮衆心城賴以完擢太僕少卿仍督安慶諸郡軍務尋進爲卿仕至都察院

右副都御史祀名宦本舊志

胡績宗字世甫陝西泰安人正德戊辰進士授翰林院檢討歷南京吏部郎中嘉靖元年擢守安慶仁達明斷瞻文學負海內名行政多風采始至值逆濠兵燹餘殫心撫輯瘡痍乃甦郡嘗災風猛勢烈稽首祈以身代言訖雨注皖每苦旱爲築龍瀨開吳塘烏石堰而灌溉之利賴至今教民先敦本善俗作五箴以示勸備修文廟祭器樂器建射圃進諸生行鄉射禮暇時講學郡齋諭以修治之義表揚忠節纂輯郡志民知鄉方人文彬彬

懷寧縣志 卷十四 名宦 二十二

蔚起甫三載改吳郡皖人攀轅垂涕爲立去思碑仕至河南巡

撫都御史事蹟附見明史劉訥傳祀名宦四庫全書存目嘉靖安慶府志三十卷胡

績宗撰爲記二表二志十二傳十二不分細目其門人王漢序之曰今郡縣志分門立類撮要標目爲類書之體而非史之例是志一循古文無復分門之類之規規也然第四卷已作職官表第七卷又作職官志則於例亦頗不純

陸鈞字容之浙江鄞縣人登進士由比部出知安慶府端重有

雅量爲政務舉大體不事煩苛民便之尤加意庠序翼興士類

三年擢副使官至都御史本舊志

羅英字汝延湖廣江夏人登進士以刑部郎中出知安慶府嚴毅精明馭左右不少假借屬吏某以甲科招物議每切責不貸值歲旱出舍於郊作辭自誓雨隨足民賴有秋後進副使本舊志

石簡字廉伯浙江臨海人登進士歷兵部郎中出知安慶府性剛介而度宏偉爲治不亢不隨豪橫屏息均節賦役定爲圖籍郡邑賴之處僚佐謹然如弟昆優禮賢士渾忘勢分祿奉所入以待餽予而內人無金珠之飾後官至都御史皖人思之立碑於名宦祠側曰郡侯石公民之父母

本舊志

陳暹字德輝福建閩縣人登進士授大理評事歷寺正擢知安慶府廉靜平恕約己裕民嘗入覲令家僮歸易稅以充行橐計歷任俸資僅給日用而已斷刑尤詳慎不妄出入人罪宿松有田荒而畝存者民歲賠其糧暹力請諸臺紓之六年轉兩淮鹽運使仕至遼東苑馬寺少卿

本舊志

李遜字子益江西新建人登進士由南京刑部郎中擢守安慶明爽愷悌愛士恤民修建學宮書院息訟省役禁科派杜侵欺歲旱禱雨輒應桐邑湖多子池爲民世業官槩徵之且加課蘆課亦溢額千餘金公廉得其情白諸當道免之後以憂去民感德相率建祠肖像祀之祀名宦

本府志

王宗徐字鵝泉江西舉人學宗濂洛由南臺出守安慶政績卓越以忤當道去官敝廬蔬食晏如也精形家言於皖城東郭外建浮屠七級以砥江流皖用是日盛皖人思其德肖像於石以

志不朽祀名宦

本舊志

胡心得字襟寰浙江德清人進士萬歷丁丑守皖清正古質日

求民利害而興除之尤慕古忠孝節義多建祠表祀贍文章書

法亦適逸

本舊志

葉夢熊字龍潭廣東歸善人由進士拜臺御史以建言謫官起知安慶府爲治識大體不務苛細其所興除皆大利大害如繕城隍修學宮其較著者有水旱災極力爲民請命最愛士經其月且輒不爽邑紳阮自華甫弱冠夢熊見其文曰王充蔡邕之儔也奏最轉雲南副憲夢熊豁達宏偉負古豪傑槩以經濟自許後總督甯夏邊務許便宜行事設奇制勝生擒孛承恩俘闕下晉兵部尙書加太子太保敍功宜準靖遠新建封例以前督失機被逮夢熊捷疏推其半讓前督止襲錦衣千戶而前督得

懷寧縣志

卷十四 名宦

一二十四

復爵真古大臣之用心也祀名宦

本舊志

許評字月軒河南內鄉人進士萬歷丙戌守安慶肅敏廉介治郡如家鋤奸旌善不遺餘力性喜布素公服之外不著錦繡偶有一吏著絲履評見而答之且以爲諸役戒轉陝西副使祀名宦子維清維新俱博雅有才名與方廷尉大鎮阮太守自華輩聯五君社文辭膾炙一時儼然鄴下之勝後皆領鄉薦維清子宸舉崇禎庚辰進士維新後爲安慶府推官自有傳

趙壽祖字紉蘭河南人進士萬歷庚寅守皖碩膚偉抱豐采奕奕尤具人倫卓鑑諸生問業過目輒評罔不洞中肯綮相國何文端甫弱冠卽以公輔期之凡所拔識皆至公卿大夫卽一藝

當心者亦爲明經邑宰皖百餘年來作人之盛未有若壽祖者
當時課藝有蜚聲錄行世

本舊志

徐民式字檢吾福建莆田人進士知安慶府識略宏達明斷善
聽有訟至庭輒諭遣之以治行高等擢光祿卿尋晉都御史祀

名宦

本舊志

喬進璠字名墀河南攷城人慷慨英敏以興利剔蠹爲己任皖
江魚利舊爲豪右所擅進璠奪而歸之民夙弊一清權要皆爲
斂手仕至參政

本舊志

連繼芳福建人進士萬曆癸丑守皖繼芳博學善屬文居官慈
惠不苛去之日民有百歲者送以詩曰老人一百歲賢侯二千

懷寧縣志

卷十四 名宦

二十五

石百歲幾賢侯惟侯居第一

本舊志

趙世徵字鈴岡福建泉州人進士萬曆間知安慶府世徵世家
子布衣蔬食甘若寒峻冰蘖之操初終如一日與諸生講論媿
媿不倦故丙午丁未兩闈得人爲盛仕至巡撫

本舊志

楊堯華河南人進士萬曆丁巳守皖古質簡靜不事矯飾正己
率下清如冰壺尋轉陝西道歸裝止三束圖書數卷而外無長
物焉祀名宦

本舊志

沈中英浙江嘉興人萬曆癸丑進士己未守皖慈仁寬恕生平
無疾言遽色呵譴不逮胥徒及解任院人垂涕攀轅

本舊志

史祥字應秦山西代人以貢生授安慶府同知攷績登上最進

階朝列大夫祥負性剛介不可干以私識度宏遠博覽羣書得其旨趣臨政詳慎宿弊盡剔

本舊志

顏祿壽字天被湖廣巴陵人舉人宏治庚申同知安慶府事沈毅有謀儉素如寒士蒞民和易故下情得以自盡郡縣事多所佐理所至建壇墮館署橋梁寢墓敝者輒規畫修之凡屬邑孔道之旁手植松檜偃蓋垂蔭痺人忘勞今猶呼爲顏公路云

本舊志

熊汲字引之江西南昌人成化二年進士歷官刑部郎中法家稱爲平允以部災左遷台州推官進安慶同知政尙平恕百姓愛戴之尤贍於學問遴庠彥與之遊多所成就後歷守三郡督

學閩中終廣東布政司參政

本舊志

楊廷用四川宜賓人貢生正德六年授安慶同知剛介不阿有爲有守在郡八年升應天府

林有祿字以賢福建莆田人舉鄉貢授江西瑞州府同知以母憂歸正德十四年復除安慶比至逆濠來犯有祿匹馬入圍與郡守張文錦同心効死以守攻且急守益固城完而賊遁後供億王師佐理郡事著有勞績擢兩淮都鹽運司同知咸以爲賞

不逮功云祀名宦

本府志

吳江江西豐城人舉人政尙平易民多德之

蹇達四川巴縣人萬曆乙亥任皖郡丞明敏有幹材攝望江篆

望舊無城達請於御史中丞鳩工營築七閱月而城竣丙子城
桐城亦力主其議後流寇蹂躪二邑得安全達之功遠矣

本舊志

王治心山西忻州人舉人崇禎十三年授安慶同知古質樸心
不假人嘖笑日進脫棗飯灌園植蔬以自給夏一葛冬一褐遞
更而已職掌江防屯糧二事嚴覈汛兵虛伍力剔屯徵隱佃強
禦憚之比寇警治心典一門中宵不寐顧不喜弁流張皇故堦
丁得休息驩然忘勞適舊懷令黃配元由南臺擢御史開府皖
江以清官第一薦巡撫張亮草疏請以治心守廬州治心懇辭
亮不能強乙酉左兵破安慶治心具衣冠端坐廳事大罵曰爾
客兵何故作逆爾皖兵何故助逆我恨不能盡殲爾遂遇害祀

名宦

本舊志

胡暕字彥暉湖廣沅江人監生任安慶通判性方嚴有識量能
勝繁劇豪猾斂迹禮樂農桑次第修舉

羅文衮湖廣寶慶人監生性明達留心撫字日夜孜孜民賴以
安堵焉

徐義永平遷安人通判安慶好營建民悅而事集雖費而不傷
由其信且勤也

張紀廣東順德人貢生出納公平倉儲少弊

張叔豫江西永新人鄉舉第一登進士改翰林院庶吉士出爲
安慶通判以鋤奸興學育才爲己任郡長及佐咸斂手退避郡

中權量皆其審定獎拔諸生多所成就愛皖山之秀自號皖山逸叟云祀名宦本舊志

侯自明字景德陝西白水人登宏治壬戌進士正德丙寅授戶部主事有能名善談論卒以此取毀出判安慶以幹濟自負任以事無不曲盡壬申霸賊南犇寇及安慶自明先身拒之得不

擾官至按察司僉事本舊志

何景陽舊志作陽從明字仲叔河南信陽人貢士初知巢縣有

惠政正德丙子通判安慶嘗攝太湖篆人皆懷之逆濠圍城景陽率其子弟為士卒先晝督餉夜督戰必勝之氣凜然以功晉

右軍都督府經歷祀名宦本舊志

懷寧縣志 卷十四 名宦 一二十八

鄭禧浙江縉雲人舉人有文學任通判三年才識明爽本舊志

謝拱宸河南息縣人舉人亦有才識剖決明敏本舊志

歐騰宵廣西人由鄉貢授安慶通判以清慎著天啟甲子臺使者閱城見多傾圮知騰宵廉而才委董修築之役周城三千七

百餘堞閱兩載而工竣視舊加固臺使者表其功加同知銜皖

人立祠祀於學宮之側本舊志

李欽吳直隸東安人正德八年進士持身清白鞫獄明允多所

平反雖得罪於當道僚長弗恤然性剛峻人或病其厲云本舊志

推官劉澶字原智四川江津人慈惠明決推讞詳審民無冤抑

獄無留滯 宋瓊湖廣漢陽人才識通敏鞫獄廉明 張訓河

南汲縣人監生操履清正理刑平允 沈珪浙江餘姚人寬猛相濟折獄得情 王道中字汝立直隸撫甯人正德九年進士年少精吏事臨獄明恕三載奏最召入爲刑部主事 李廷松直隸安肅人嘉靖十七年進士性純厚有操守擢監察御史後爲浙江按察司僉事 見舊志職官注 胡汝霖四川綿竹人鄉貢第一登乙未進士選庶常改禮科給事中以論權貴謫太平經歷擢安慶推官禮賢下士平易近民讞獄務在矜恤民無冤者未幾遷吳郡丞後爲廣東提學僉事 本舊志

許維新父評見前傳維新領鄉薦任安慶推官廉幹有聲不減

於父攝府篆必移公座偏向不當先人故處先是評去任時手植石榴一株於庭至是朱實離離維新迎母就養因取以奉焉維新去皖人封殖此樹比於再世甘棠維新子宸崇禎庚辰進士

徐霈浙江人進士授安慶推官謹厚明恕鞫獄多平反甲辰乙巳大旱當道屬以賑務殫心經畫流亡賴以全活擢兵科給事中後爲河南提學副使 本舊志

黃鳴喬福建人進士萬曆壬子司理安慶寬仁明恕善於其職具文章卓識所振拔皆一時名士

王孫昌河南杞縣人萬曆戊午爲皖司理慷慨多才略剔弊鋤

奸豪胥斂手尤欣慕古節義名勝余忠宣公祠墓及大觀亭官塘樓皆重新之

本舊志

常自裕河南鄆陵人進士天啟辛酉爲安慶推官讞獄明允肺石無冤丁卯三王之國道經皖江先聲折毀河潛民居以開纜徑又索繹夫數千名民間騷動自裕毅然請於侍從曰王舟由裏河達淮可以繹挽今安慶上駛皆大江風便日數百里夫將安用遂不爲備適北風大作羣艦悉開民獲安堵甲子南闈分房所拔多名士嗣行取擢內科祀名宦

本舊志

王端直隸永平人由鄉貢授安慶推官性貞廉一介不苟取故事巡按御史按部凡有司之臧否閭巷之奸宄衙胥之蠹蝨屬

諷於理官猾吏乘間抵隙以愛憎爲毀譽以賄賂爲愛憎民間指而目之曰水黨黨之蠹蓋百年一日矣被其毒者往往破產殞命獻妻鬻子而若黨則衣輕食肥橐盈宅潤衆明明而莫可誰何間有發其奸者羣黨復釀金代贖僱役代答事竣挾多金營入爲上臺侍從作狡兔窟熾洞其弊絕不倒持太阿稍漏意旨故一時大猾胥斂迹云端剛毅持正不附要津用是被論劾去歸橐蕭然邑紳阮自華贈以詩曰廉吏從來不可爲孤臣垂橐去何其家鄰帝寢知宵旰歸自江潭更險巖人事已逢爭鬪劫天心豈欲治平時薜蘿秋老揅教盡歸到灤州見伯夷

本舊志

來集之字元成浙江蕭山人崇禎庚辰進士壬午爲安慶推官

安慶困兵荒十餘年迫於饑寒罹法者多集之慎讞獄凡小眚悉宥之前後數上蠲漕議災民賴以蘇息癸未左兵萬艘泊江潯擄婦女無算集之直入總兵方國安營贖回之民獲完聚集之學問深邃尤善古文辭好引士類暇常進諸生論晰疑義問字者踵相錯分校鄉闈所得皆名士後以行取去著有易象圖

易隅通諸書

本舊志

經歷楊琦四川人監生永樂初舉賢良方正授安慶經歷事無留滯簿書會計詳察無遺王貴陝西人監生梁浩山西定襄人監生皆勤修有才幹克盡其職王誌河南南水人監生端謹有度言笑不苟履任九年致仕去張宿湖廣人監生嘗署望江知

懷寧縣志

卷十四 名宦

三十一

縣事立而民不擾

知事余霖浙江人監生臨事不苟胡希綱四川眉州人監生謹飭勤審皆案牘無遺克稱厥職曹江直隸人監生守職能貧民切去思秦良相山西榆次人吏員亦慎操履能任事

照磨向潛湖廣臨安人監生胡能直隸涿州人監生皆厚重勤能克稱厥職司賈鳳山東泗水人監生和平溫厚蒞事勤敏陸鎰浙江錢塘人監生以能副委任見稱

檢校馬銳直隸內黃人監生性行純敏勤於奉公

張珂直隸大名人監生正德庚午任安慶檢校己卯春逆濠作亂將薄安慶時城西雨壞十餘丈珂日夜董工手自擊柝不數

日而城完賊無所得九年致仕去

本舊志

姚諒字允夫河南祥符人貢士任府學教授逆濠之亂與諸武

弁同事守禦悉心贊畫與有全城之功

本舊志

虞仲恭浙江義烏人貢士由知縣左遷安慶府學教授節省廩

俸置學田以贍貧士皖學有田自仲恭始

本舊志

羅用俊江西太和人貢士由青田縣學教諭遷安慶府學教授

以正學勵諸生文行並立有貧不能婚與無居者捐俸助之或

假貸不能償遂焚其券修葺齋舍不煩有司後遷國子監學正

三子皆登科甲為時聞人長子欽順尤理學之宗祀名宦

本舊志

柳鳴鳳鳳陽人安慶府學訓導每課士必稱引古人忠孝事媿

媿不倦乙酉城破鳴鳳整冠服升明倫堂厲聲斥亂兵曰我學

官義當死學爾輩速殺我不得犯聖宮言訖冒刃而死

本舊志

王璟字明仲雲南建水人宏治庚戌進士來知懷寧才識通敏

應變有方郡西郭舊無橋民多病涉璟創建石梁至今德之諸

藩王先後過安慶供億有度而民不擾後召為監察御史祀名

宦

本舊志

劉鳳翔字德輝河南光山人成化壬辰進士授懷寧知縣才思

敏達治事有方尤加意學校士心歸嚮民亦懷之召入為監察

御史仕至按察司僉事祀名宦

本舊志

韓明字維遠浙江餘姚人成化乙未進士授懷寧知縣廉而勤

公而有守律已正而接人和民至今稱之召入爲監察御史仕

至按察司副使祀名宦

本舊志

王誥直隸霸州人舉貢士初爲盱眙令正德乙未調懷寧履任旬日值逆濠之變誥宣明號令鼓舞軍氣獨守城北晝夜與賊戰賊數敗去以功遷蘭州知州祀名宦

王用朝隴西人進士明爽有才擢御史

李一甯廣東東莞人貢士初任雞澤縣教諭遷蘇州教授兩地皆祠祀之比遷懷令誠心撫字諸凡不便於民者悉省之雖忤上司弗恤守己尤清約疾卒於官士民咸痛惜之祀名宦

本舊志

楊紹中字長源湖廣雲夢人萬曆戊戌進士授懷令厚重端凝

懷寧縣志

卷十四 名宦

三十三

寡言笑嚴取與糾紛立斷夙弊一清中官季某權稅湖口所經之地官皆匍匐紹中獨與抗禮毅然不屈其剛勁大率類此

本舊志

張廷拱字輔吾福建同安人萬曆辛丑進士授懷令才幹敏給出以至誠懷徭役田賦偏累寡戶廷拱酌數之中畝四丁一著爲令而賦平捐俸緩以收無告講誥諭以誘氓俗日進諸生論晰經義所鑿拔皆一時之選廷拱少貧鉛槧外間涉獵治生之術以故民間疾苦公家利病無不洞悉事務沓至應手立解仕

至宣府巡撫

本舊志

吳之才字室白江西新昌人萬曆丁酉舉人壬子任懷令務存

大體陋規一切禁革歲苦蝗之才力捕之計石數給銀米癸酉水災力請蠲賑全活甚衆尤崇學校月有課甲乙悉當一時人文蔚起如劉宮坊若宰宣給諫國柱顏銓部渾皆出其門下士民愛之如慈父母考滿擢陝西西安同知之才二子泰來甘來俱成進士甘來以禮科都給事殉甲申難

本舊志

彭參字魯公四川閬中人萬歷己未進士知望江縣尋調懷令政尙清靜以四則諭俗刊布周道民皆嚮化先是徵賦類有重耗民苦之參盡革前弊勤加撫字旋擢刑部主事去之日貧不能束裝闔邑如失乳媪

本舊志

陳希文洪武中爲懷縣丞指揮畢銀奏奪民地希文知其誣欲

直之郡守遣人告曰如詔旨何希文執不允銀詣縣浼希文希文叱出之事聞卽命希文治其獄得白上嘉其直擢知山東青

州府祀名宦

本舊志

趙瓘字克賢直隸長垣人以賢良方正徵授懷縣丞聰察廉勤處衝劇若無事撫逃移使復業修葺廡宇壇壝祠廟民不勞而事舉其後有胡詮亦以賢良方正應徵性敏捷有幹濟岳鳳監生亦有才幹屢攝縣篆能治煩劇守亦足稱胡貢湖廣人吏員謹慎自持民稱不擾焉

主簿劉志文湖廣人勤而惠下湯相湖廣靖州人監生任事勤慎心乎愛民因偪於位不稱志棄官引去典史有晁鼎者善承

委用事不避難

汪康運字當世歙縣人天啟丁卯舉人署縣教諭長厚醇篤嚴重有體每月集諸生課藝以志行相勸勉資貧生膏火以佐誦讀門下爭飭廉隅崇風雅有蘇湖之遺澤焉

俱本舊志以上文職

明張能山東鄒人從高帝克懷來永平大戰鄭村及白溝河身受重創論功授安慶指揮同知尋攻克東平淮泗論功陞遵化指揮使後北征至上刺河年已垂耄猶奮勇先驅卒子福襲宣德間子綱調安慶世襲

劉源山西平陽人從高帝征張士誠又從北征攻破岢嵐出塞三次每單騎陷陣斬獲獨多以功封指揮同知

張勤河南棗林人從高帝攻武昌帝時率輕騎出觀形勢突遇敵帝馬蹶落湖勤從旁大呼連發數矢射退敵擁帝歸時倉猝恐忘姓名割繡袍一幅賜之以誌其功後封指揮人稱爲繡衣張

孟政山東張邳人元末避亂江淮聚衆自保會明高帝義師起相率歸附從大將軍徐達伐吳困於牛塘政單騎出救殺一將身被數創授指揮後征平緬爲先鋒營壘未成蠻兵率百象突出衆却走政躬燃炮殲一象羣象反鬪斃其巨帥捷聞拜左都督同知世襲指揮僉事

殷福浙江長興人初從曹國公取嚴州有功李伯昇以二十萬

衆圍新城福直衝陣中斬首獨多尋北征克野狐嶺封指揮僉事

方煥沔陽人家至富爲鄉里推戴集衆三千人陳友諒招之不赴聞明高帝威德慨然投誠由湖湘間道彭蠡輸餉四千石拜麾下煥修幹長跪如聳立帝異之恐爲友諒詐降時友諒立七寨帝屢攻不克乃賜煥馬三十騎令取之煥遂連破三寨授先鋒總統後征克雲南論功應侯次子鑑又從成祖有功乃封兩子俱指揮長欽世襲雲南次鑑世襲安慶

蕭正將樂人從明成祖北征至大城又征麓川反寇思任又從定西伯蔣貴征雲南有功封指揮僉事

馬義河南新野人正統間以戰功試百戶再擢副千戶征孟卷景泰間征福建湖廣天順間破兩廣大藤峽兵部以將材薦授指揮僉事奉勅充左參將子斌襲指揮僉事

前志複見宦業傳今削

崔興徐州人從明高帝征僞夏明昇破瞿塘水寨取芙蓉諸洞守蜀洪武九年封指揮僉事

紀雄和州含山人明高帝時征雲南陣亡長子善隨征亦亡孫瞻封指揮僉事

朱善舒城人明高帝初起濠卽隸麾下從渡江克集慶路又從攻太原率死士百人夜襲擴廓營破之封指揮僉事

以上十二人並安慶

明楊銳字進之蕭縣人嗣世職為南京羽林前衛指揮使正德初以才擢掌龍江右衛事督造漕舟於淮安宸濠有異謀王瓊以安慶居要害宜置戍乃進銳署都指揮僉事守備其地銳與

知府張文錦治戰艦日督士肄水戰智囊補楊銳守備九江安慶諸郡既獲江賊監司喜

銳曰江賊何足憂所虞者豫章耳意指宸濠也又謂九江為鄱陽上流不可恃湖最要害當以九江中左所一旅置戍於湖口縣之高嶺可以遠望有警即可達乃繪圖呈南部及冬臺又請戰艦若干艘習水戰於江上城中治兵食多浚井按置戍湖口

與史異十四年六月丙子宸濠反東下焚彭澤湖口望江已卯奄

至安慶城下舟五十餘艘銳文錦與指揮崔文同知林有祿通

判何景陽懷寧知縣王誥等禦之江潏已收兵入城被圍銳文

軍城西文錦有祿軍城北景陽誥軍東南城西尤要衝銳晝夜

懷寧縣志 卷十四 名宦 三十七

拒戰殺傷賊二百餘斬其間諜乃稍卻府志銳守備安慶購鐵數千金招冶工鍛造鐵

具形類棗核數百枚人不知其所為及宸濠舟抵皖口銳預於水許夜置前鐵具賊舟方爭泊岸半為鐵具衝裂濠氣沮喪智囊補設鉤距於江側禁勿泄比寇至船二百餘艘抵岸為鉤距所破蓋即志所謂鐵具也七月丁酉以本紀推之當

為己酉賊悉兵至號十萬舳艘相銜六十餘里宸濠乘黃艦泊黃

石磯身自督戰江西僉事潘鵬在賊軍安慶人也宸濠令諭降

吏黃洲者以大義責數之鵬慚而退既復持偽檄至其家僮見

遙呼之銳要斬以徇鵬遜去賊怒圍城數周攻益急銳等殊死

守賊雲梯數十瞰城中城中亦造飛樓射賊夜縋人焚賊樓賊

置天梯廣二丈高於城版蔽之前後有門伏兵其中輪轉以薄

城城上束葦灌膏燃其端梯稍近即投之須臾盡焚賊多死時

軍衛卒不滿百乘城皆民兵老弱婦女饋餉人運一二石數日積如山賊攻城城上或投石或沸湯沃之賊輒傷銳等射書賊營諭令解散有亡去者乃募死士夜劫賊營賊大驚擾比曉稍定宸濠漸憤會閔伍文定等破南昌遂解圍去

舊志濠督眾運土填塹內薄攻

城城上矢石如雨賊多死傷智囊補濠率眾分攻五門各首舉木為蔽銳裂帛布覆紙裹火藥千數散投所蔽木上火發盡棄而走火光周匝不絕寇無所避復於北濠結木為棧與城接挾兵而進城中大驚銳詭以大將軍火銃實石被緋金鼓迎置城上寇兵望見驚懼未進潛使一卒從間道出燒棧絕寇眾解散且溽暑力憊夜鼾睡去銳疏募善泅者數人於船中聞鼾聲即斬首絕其纜又遣一二強卒突入岸上營舉火噉城上

應之乘勝捕殺聲震數里濠浩歎出涕揚帆而去文出城襲擊又破之旬有八日而圍解事聞武宗大喜擢銳參將分守安

徽池太寧國及九江饒黃世宗立論功擢都督僉事廕子世千

戶崔文世為安慶指揮使守城勞亞於銳世宗錄其功超三階為都指揮使廕子世百戶江淮多盜廷議設總兵官督上下江防擢文都督僉事任之改蒞南京前府專督操江並祀名宦

見明史

黃得功號虎山開原衛人其先自合肥徙早孤負奇氣膽略過人由行伍累功至遊擊崇禎九年遷副總兵官分管京衛營十一年以擊賊功詔加太子太師署總兵銜十三年從太監盧九德破賊於板石阪賊革里眼等五營降十四年以總兵與王憲分護鳳陽泗州陵得功駐定遠張獻忠攻桐城挾營將廖應登至城下誘降得功與劉良佐合兵擊之於鮑家嶺賊敗遁反至

澗山禽斬賊將闖世王馬武三鷄子王與國三鷄子獻忠養子

最驍勇者也得功箭傷面愈自奮與賊轉戰十餘日所殺傷獨

多明年移鎮廬州汪有典史外十一年史可法為安廬道得功

在潛桐間遣得功來救殺賊入山中殺賊遇害公怒提出而史公部

將朱三才者一日飲酒醉入山中殺賊遇害公怒提出而史公部

賊數百騎而下還獻忠之在巢湖也焚樞陽奪商舟百餘艘募權

也公夜半至綠山背謀而升賊大擾越城長嶺潛山之險阨處

山天井湖老鶴頭黃泥港六十里橫尸無算奪畜產數萬救回

難民數萬人賊腹心謀士婦豎皆盡於是散而便道攻桐有

關曰北峽阻深為賊出沒地安廬道鄭二陽命部將廖應登自

逆之應登兵大潰得功有愛將曰林報國每用兵輒為前驅賊

畏之亞於得功至是報國至而賊趙虎者伴北誘報國深入殺

之羣賊正相賀得功突入虎陣斬虎衆復潰而走賊有勇將號

無敵將軍大呼馳至得功力擒之橫置馬上左手按其臂右手

策馬去賊衆大驚於是應登潰兵乃得會於桐十五年有給事

懷寧縣志 卷十四 名宦 三十九

中効公擅殺桐將張寶山寶山以夜入山襲賊兵潰死於得功

乃以得功為都督兼太子太師予禁兵三千用兵江淮楚之

間是年十一月張獻忠蜀桐急是時得功駐兵鳳陽縣令張利

民遣人間道告急於得功來者呼軍中日至得功兼程進自鳳陽三

日行六百里賊有自北來者呼軍中日至得功兼程進自鳳陽三

皇棄其軍資而去得功追及之獻忠呼曰吾為將軍取公侯留

獻忠勿殺不亦可乎得功曰吾第欲得汝頭耳何公侯為也急

擊之賊以轎重牛馬遺民男女塞道追少緩逸去夜半回桐明

日縣人出謝得功深自辭讓曰諸君守城勞苦得功殺賊自其

職何謝也所以所獲牛五百給與民間告有司當勸耕毋怠是夜

越二日復至城下慮賊復來潛伏山間待之賊不至乃還得功

嘗遇獻忠於石牌幾成禽矣忽大霧彌漫而獻忠遁又嘗射獻

忠中之復舉鞭碎其顛左偏獻忠負痛驟馬奔得功馬忽蹶易

馬追之獻忠逸去得功每與賊戰遇賊遁輒仰天呼曰天不欲

我成此大功乎泣數行下十七年封靖南伯福王立江南進封

侯旋命與劉良佐劉澤清高傑為四鎮清兵渡江得功屯蕪湖

福王潛入其營得功方督戰而劉良佐已先歸命大呼招降得功怒叱之忽飛矢中其喉偏左得功知不可為拾所拔箭刺吭死其妻聞之亦自經總兵翁之琪投江死中軍田雄遂挾福王

降曰史外清兵破揚州遂下金陵福王奔蕪湖至得功軍得功驚

言先出乎因歎曰三百年國運爭此一時十五省皇圖歸此片

土臣進不能戰退無可守大事去矣與清兵戰於荻港得功時

傷劉良佐大呼岸上招降良佐殺賊亦有威名每乘斑馬破賊

賊中稱之曰花馬劉至是得功見良佐招降則大怒裂眦皆上

衝冠叱而罵之曰汝乃降乎降將張天祿從良佐後射公中喉

公知事不可為呼良佐曰花馬兒黃將軍男子豈為不義屈事

不濟命也擲刀拾所拔箭刺喉以死夫軍資沈於江亦自

勿按史載得功戰荻港時傷臂乃追殺禦左夢庚時語非與清

兵戰荻港也史外疑誤餘與史略同而加詳惟前叙救桐城事

於下以備參考得功每戰飲酒數斗酒酣氣益勵喜持鐵鞭戰

鞭漬血沾手腕以水濡之久乃得脫軍中呼為黃闖子其軍行

紀律嚴下無敢犯所至人感其德廬州桐城定遠皆為立生祠

葬儀真方山母墓側見明史史外葬蕪湖赭山土人為之立廟

程龍官副將今四忠祠崇禎十年賊羅汝才犯安慶龍從巡撫

張國維禦之鄂家店賊先犯參將潘可大營龍至夾擊之賊多

死夜復至中伏亦敗去賊合七營數萬眾齊至圍數重諸將突

擊頗有殺傷史可法偕副將許自強馳救諸將呼譟突圍會天

雨甲重不得出賊四面入可大戰死龍引火自焚事聞贈都督

廕一子散見明史陳于王史可法張國維傳中

潘可大江甯人崇禎八年授安慶營守備尋進遊擊流賊犯桐

城官軍覆歿可大與知縣楊爾銘等守城不下巡撫張國維赴援圍解丁丑賊從間道突安慶石牌尋移桐城可大擊走之賊爲廬鳳軍所扼復回桐掠四境可大偕道臣史可法協力勦捕以功加參將與副將程龍等禦賊鄧家店被圍不得出戰死事聞贈指揮廕一子史可法爲立祠皖城東與程龍並祀焉

張韜江南人撫軍史可法麾下遊擊也丁丑賊勢熾甚諸將戰沒於鄧家店韜提孤軍殺賊過當死於桐城之崆口鋪撫軍每語人曰使吾張韜在賊不鳴張至此

本府志

杜先春崇禎初遊擊勇略過人每好劫賊營寨賊畏之凡先春所至率避去戊寅秋七月賊與先春遇於英六界遂從間道奔

太湖先春偵知亦兼程至太湖援勦追賊於造家山賊執土人問曰此誰將皆以爲先春賊不之信曰彼豈從天至邪因約集五營賊爲之斷絕糧道日久援絕力戰死

本府志

張其威吳淞指揮

明史張國維傳作把總

崇禎八年二月流賊張獻忠七

十二營寇潛太宿奉調救援兼程趨進

張國維傳遣把總張其威趨太湖

賊衆

騎兵數十萬威僅步卒千餘人衆寡不敵又值天雨礮火不能施戰死於福昌嶺寺僧收殮焉逾兩月侄文學張秉至載其柩以歸士民爭致賻焚香路祭哭送盈途

陳于王字丹衷吳縣人世爲蘇州衛千戶巡撫張國維用爲中軍守備崇禎九年賊犯宿松弟國計陷陳于王驟馬入拔之而

出十年禦賊鄂家店諸軍悉歿于王手執大刀左右殺賊傷重
力竭北面叩頭自刎死越十日面如生事聞贈于王昭勇將軍
指揮使世廕副千戶

見明史

蔣若來字龍江江蘇常州人以戰功拜右都督府都督守安慶
十五年獻忠陷安慶若來戰敗奉旨帶罪立功是年秋偕黃得
功劉良佐復大破賊於潯山復原官賜玉帶仍守安慶歲甲申
流賊破京師若來以道遠不及勤王爲恨乙酉清兵下金陵所
在臣服若來竄走欲爲航海計有副將陰散其兵劫使歸順若
來召諸將至與痛飲曰諸公好爲之各行其志勿相強也呼愛
妾出手刃之遂自殺於座上

據沈德潛集補以上武職

清李猶龍字紫函陝西洵陽人貢生原任兵部主事歷太僕少
卿英王初定江南任院撫院苦兵十餘年乙酉四月叛將赭城
俘士女以去猶龍單車入視掩骼埋胔收救俘民八千餘人廉
叛將於烏池僇之降卒分隸院軍者數千恐其散爲民害乃先
汰其老弱已復陸續聽去六邑山砦四百八十有奇接攘楚豫
蠢蠢思動猶龍馳諭開示禍福反復千言一朝解散時初開科
取士集六院諸生資之舟楫薪米得以首應文運未期年內召
授天津巡撫院人爲立去思碑建祠祀之並祀名宦

李棲鳳遼陽人順治丙戌撫院揚賊據湖會道鎮兵進勦院屬
宿邑當兵衝連歲災眚民苦奔命棲鳳徧檄江南諸屬運餉以

時徵調集於宿民不罷勞事平有連坐者吏收以請悉釋之民

懷其德建祠立碑

本府志

李日芄字培原遼陽人世業儒甲申以從龍功累官至御史丁亥任操撫駐節江寧初以堵截金聲桓來皖凡取民間一芻一粒咸籍之以抵正供戊子移鎮皖皖治濶太二邑多山先是土人立砦避賊聯絡四十八區接壤楚豫凡八百里至是不逞之徒僞奉勝國名號據險焚劫日芄勦撫兼施旬日平定取賊册焚之有告發者皆不治大軍征滇粵道經安池驛徭不息日芄捐貲市馬田民得無擾明初籍田編戶定爲里役其流至有產絕而役不休富家大姓隱串詭寄巧避公旬日芄均畝編戶手

定經賦全書貧民乃得以事生產辛卯淫雨傷稼糶米減糶請蠲懷邑荒田八百餘畝壬辰旱復請蠲賦並改折漕米疏再三上必得報乃已當戎馬倥偬之際投戈講藝創立書院捐置學田嘉惠來學兵氛旣靖不懈江防後值海寇之警冒暑進勦遂得疾乙未卒於官皖人建祠以祀祀名宦

本舊志實政碑記

秦世楨廣寧人順治八年巡撫江南墨吏蠹胥誅逐不遺理囚多所平反漕卒爲橫索贈無藝疏請立五米五銀法著爲令

據一

統志補

蔣國柱字君砥遼東人順治丙申操撫江南駐節安慶時黔粵未靖皖當水陸孔道羽檄往來戎馬所需歲以萬計丁男罷於

奔命國柱疏乞沿途分役均牧民得按堵厲兵飭防令肅而不苛澄江數千里無萑苻之警修葺學宮獎勵師儒人文一振後移鎮蘇州士民借寇不獲因立碑銘德焉

本府志

張朝珍字玉如廣寧人順治辛丑撫皖時海氛未靖朝珍飭江防修軍實簡訟寬徭恤農愛士偶值災旱疏請蠲賑並改折大造於民辛亥丁內艱去壬子起撫楚過皖皖人操舟迎送數百里外後聞其卒建祠以祀

本府志

靳輔字紫垣遼陽襄平人隸漢軍鑲旗初授翰林院修撰康熙十年撫皖廬鳳間飛蝗滿野輔齋沐牒城隍神不旬日而蝗滅皖屬頻旱民多流亡輔撫卹招徠復業數千戶疏請蠲賦並改

折因檄十郡倣耿壽昌常平朱子社倉遺法以備災患凡古蹟有關風化者悉興復之修郡庠興書院設義學一時人文彬彬稱盛奏言爲政首在足民足民在因民力而教以生財之方大江以北如鳳陽等屬盡失溝洫之舊一遇水旱卽成石田今欲足民莫如力行溝田之法溝田者古井田遺意也然井田法制繁重溝田但鑿一溝修濬甚易其法以十畝爲畝二十畝爲一溝以地三畝有奇爲二十畝中之經界二十畝之外圍以深溝溝道廣丈八尺溝廣丈二尺深七尺五寸開溝之土卽累溝道上使溝道高於田五尺溝低於田七尺澇則車入溝中旱則灌溝水於田內溝田有四利水旱不虞一也下流不憂驟漲二也

財賦有出三也經界既正無隱占包賠之弊四也疏方下部議行而滇閩變作十三年吳耿二逆寇江西輔練標兵募鄉勇嚴斥埃遠偵探武備大振水陸絡繹糧餉接濟皆適機宜民不知兵巨寇宋鏹踞徽郡山中爲亂輔遣兵躡勦以計擒之境內以安部議省驛遞費以佐軍輔謂省費莫若省事必事關軍機專騎馳奏餘悉彙奏以三事爲率議上著爲令歲省金錢百餘萬蒞任七年擢河督去皖人專祠奉祀著有奏疏八卷治河書十二卷祀名宦

徐國相字行清遼東人康熙丙辰以兵部尙書兼副都御史撫院院屬頻遭水旱下車卽特疏請賑又力請改折並蠲耗贈民

賴以安修葺學宮興復書院增置田租餼士人文蔚起革除里排定爲徵收之法事詳本志賦役尋總制三楚皖人建祠祀之

本府志

于成龍字北溟山西永寧人康熙二十三年春官兩江總督兼攝安徽巡撫以清操聞天下蒞總督任官吏皆望風改操知其好微行遇白鬚偉貌者羣相指自攝檄郡縣條上便宜皆爲興舉自服官後未嘗携家屬入署及薨將軍都統暨寮吏入其寢室見周身布被袍一襲鞞帶各一堂後瓦甕米數斛鹽豉數盎而已軍民繪像以祀訃聞賜祭葬予諡清端

薛柱斗字梁公陝西延長人順治戊子拔貢康熙丙辰秉臬安

徽甲子復來爲巡撫振興文教修理郡庠重葺培原書院遴取
生童肄業其中厚其廩餼又設六齋教習歲給學租課單寒子
弟月一親校初臬皖時倡修懷邑學宮以不利撫署而止既開
府乃捐廉修之復於案山前建屋四十五間以增外衛取其儼
直爲歲修費語在學校志中柱斗才識通敏體用俱備兵刑錢
穀一出親裁半載間清積案五百餘件囹圄爲空暇常與故舊
薦紳陶情觴詠興致悠然精形家言調元閣鎮皖得月照江等
樓皆其所建內轉刑部侍郎

本舊志
諸碑記

高承爵奉天人廕生康熙癸酉撫皖時盱泗等州縣河流泛溢
修築堤防庚辰復任捐俸賑饑皖人獲濟

本通志

楊素蘊字筠湄陝西宜君人順治壬辰進士康熙丁卯撫皖著
有撫皖治略一卷

李鈞盛京鐵嶺衛人廕生康熙丁丑撫皖戢兵安民緩征息訟
立義學義倉造紅船以救生修馬橋以利涉遺愛甚多

本通志

于成龍字武公奉天人廕生康熙壬午撫皖初任建德令洊陞
池守經略已具及來開府夙所籌畫次第舉行豪吏奸民重足
而立寮案咸敬憚之後陞湖廣總督

本府志

葉九思鑲藍旗人官生康熙己丑撫皖老成持重器識宏遠皖
濱大江猝遇風濤舟多覆溺皖人請開內河懷令以狀上宵小
挾私構煽乘間阻撓九思隱燭其奸下令集紳耆於書院親臨

諮之觀者萬計皆歡呼稱便乃率衆出東郊規畫形勢畚鍤雲興不數月而告成風濤不驚商賈輻輳焉營繕城垣金湯鞏固重葺培原書院更名修永月凡六課多士奮興期年之內百廢具舉尋內召爲戶部侍郎去

本舊志
諸碑記

梁世勳字鶴汀陝西三原人廕生康熙辛卯撫皖和平簡易無敢干以私地方大利弊銳意興除濬新河使避長江十三磯之險建東門康濟橋以便民涉丙申歲儉穀貴捐俸六千餘金買米平糶偶有災荒疏請蠲賑旱暵禱雨輒應尤加意學校明慎用刑善政不可枚舉內轉刑部侍郎尋以屯田勞勩成疾卒訃聞十屬軍民莫不流涕

張楷字鶴城正藍旗籍直隸長垣人舉人康熙癸巳守皖乾隆辛酉來爲巡撫初守皖時修講約亭每朔望率僚屬吏民宣揚聖諭通行六邑徧及鄉鎮皖俗以淳培學校輯郡志濬梁公河修官豸橋新余忠宣公及烈夫人祠凡有益於地方之事靡不舉行迨晉皖撫益以前治皖者推行於八郡五州焉祀名宦

朱珪字石君直隸大興人年十八與兄筠先後入翰林以博雅擅名都下京師爲之語曰若要書問二朱乾隆庚戌撫皖政尙簡淨持大體吏民安之尤加意作人成就多知名士汪庶常德鉞諸生時嘗上撫軍論手書優答又上壽聯云天下春皆歸肺腑江南人盡樂義皇其風度可想矣嘉慶丙辰再任己未召入

相卒諡文正祀名宦

柯永昇字貞階遼東人廕生康熙癸亥任安藩司駐金陵所屬七郡三州去治遠胥吏爲姦賦多溢額永昇設法嚴禁羨耗一切裁革修葺郡庠振興文教皖人懷之

周樽字眉亭雲南昆明人舉人乾隆甲寅任安藩司三護撫篆開誠布公詳慎刑獄遇事有不可者雖上官必爭屬吏有過輒面斥能改卽止不設成心尤加意作人每臨書院課士評定甲乙集諸生當堂閱卷優等者獎借有加黜退者必指駁謬誤或薄施扑教士以感奮又編纂十三經旁訓採古註疏俾肄業諸生藉資經術焉城西操江廠夜火巡撫張誠基疑楚匪潛至將

轟礮於城樓樽力爭之開城救火皖民以安嘉慶丙辰卒於官祀名宦

邵洪浙江鄞縣人進士嘉慶癸亥任安藩司藩書吏多藏奸最爲難治洪灼其弊無敢舞文弄法者歷護撫篆多善政皖人懷之

佟國楨遼陽人順治戊子拔貢康熙甲辰臬皖不爲嚴刑峻法遇死獄必曲求生理敬禮師儒崇尚文雅仲子世思以詩古文辭爲皖人所推官至江西巡撫

多宏安字君修直隸阜城人順治戊子拔貢康熙乙丑秉臬安徽弭盜綏民讞決明允軫恤獄囚案無留滯建文昌閣於城東

徧以壯形勢皖文士潘介劉宏謨劉澡方珽等爲之記載舊志
陞江西布政司去

高起龍奉天人康熙庚午爲皖廉使廣頹豐頤軀幹修偉望之
令人神肅哀矜折獄不以擊斷爲能偶有火患單騎馳救計戶
給銀米賑之癸酉歲旱禱雨輒應民賴有秋皖人作中江輿頌
以紀其事擢四川布政司尋調貴州

桑開第字于門直隸玉田人舉人順治乙酉守皖時兵火方息
田地荒蕪又值大旱力爲六屬請蠲得邀豁免民以獲甦修建
五城門樓城隍廟府堂凡所營繕一不擾民坐屬員事註誤皖
人惜之

王廷賓遼東錦州人順治戊子守皖乙酉府署燬於兵前守桑
開第經始儀門迄大堂未就初來時寄治於僚廨吏民請完之
諭以蕩離甫靖不許歷二年吏民請益堅乃許之訓吏飭兵惠
工通商省刑獄崇文教繕城隍盪山寇以治行殊等擢永平兵
備道皖人專祠祀之並祀名宦

李士楨字毅可山東昌邑人貢生順治癸巳守皖操履清潔聽
斷如神銳然以修復古制爲己任未踰年學宮名宦鄉賢等祠
次第修舉纂輯郡志文章爾雅六皖掌故資焉後撫粵東皖人
懷其舊德猶奔走不絕云

張茁字文葭浙江嘉善人進士順治丁酉知安慶府皖屬自兵

燹後民以辦課維艱田多未墾力請於部院疏題三年起徵以紓民力清丈蘆洲酌地均賦凡洲圯而課存者悉與蠲除修葺學宮日進諸生講藝多所成就一切良法美意悉載院治錄中後緣上臺檄取屬吏劣狀不應以徇庇奪職歸隱鶴湖以終趙世楨字興公開原人貢生順治庚子守皖康熙己酉卒於官洫任十年擢節愛養均一田畝科則革除錢漕羨耗省里役裁陋規禱雨捕蝗精誠昭著卒之日囊笥蕭然無以爲歛皖人肖像祠之請祀名宦

姚琅字書岑浙江石門人順治壬辰拔貢康熙庚寅守皖培植學校撫字殘黎案無留牘獄無枉縱一時有神明之譽甲寅大

兵征滇皖當水陸衝要琅殫心區畫民不知兵歷護臬篆重修郡乘以積勞成疾乞休卒於家

劉樸字懷遠山西安邑人廕生由部郎出守松江府康熙壬午守皖勤勤以培士氣振民風利濟天下爲念修書院置學田葺郡庠復應沙閣語俱在學校志中爲約法五則一曰設義塾二曰立義塚三曰汰冗役四曰禁奢靡五曰禁刁訟又條約四則一曰嚴保甲二曰禁投詞三曰旌節孝四曰勤講約實力行之著有成效請上官下其法於各郡縣通飭奉行捐置救生船重建養濟院手自爲記冀有同心廣布惠澤並示來者至誠惻怛情見乎詞焉總督于成龍歎爲良二千石皖人立有去思碑仕

至河南布政司

徐士林字式儒號兩峯山東文登人進士雍正五年守院振興文教整飭官方聽斷如流清操自勵每課士自爲程文援筆立就據寫性靈發揮經蘊一洗浮靡之習教士以矜名節務根柢爲要作二詩揭於書院之禮讓堂以式多士語在學校志中宿松孀婦田氏事姑孝兄功利其產逼之嫁與羣匪脅之婦刎於途以墜水告士林坐堂皇見黑衣女子啾啾如有所愬拘兄功質之則股栗吐實屬吏來謁輒具獄命判試其才嘗曰律例猶醫書本草也情事萬端如病者之經絡虛實寒熱淺深也不善用藥者殺人不善用律者如之每讞獄定必先摘大略牌示始

發繕文冊吏不得因緣爲奸嘗聽訟饑家人供角黍且判且啖下筭誤硃爲飴髭頤皆赤屢遷至江蘇巡撫

臧榮青浙江歸安人進士乾隆乙巳守皖是歲大旱丙子大疫賑饑問疾實力舉行全活以億萬計皖人懷其德請合祀於王公祠並祀名宦

文映朝廣西全州舉人順治二年官安慶同知遇事有膽識偵獲江洋巨盜以他事左遷時論惜之

裴國熙奉天海城人拔貢康熙間爲官安慶同知優恤士民歷攝府縣篆猾吏不敢爲奸徵租舊量二斗五升有耳羨尖羨鬆剗諸弊國熙易量爲五斗前弊盡剔嚴飭保甲境無奸民尤留

心文獻前令段鼎臣修邑志未就手續成之擢知廣西梧州府
李用楫字仁航直隸容城人進士康熙己卯由中書授皖郡丞
寬平和厚中有特操嚴緝奸宄置之峻法民俗不變分校南闡
得人最盛卒於官棺衾不給巡撫于成龍臨其喪哭奠助賻焉

本府志

謝璽陝西人監生康熙二十四年任安慶通判愛民恤才饒有
才幹擢大理寺副以丁內艱家於皖尋卒皖人哀之

本府志

李崇稷陝西岐山人進士順治初授安慶推官勤督漕運分校
南闡頗稱得士升吏部主事

黃熙績字敬庵福建晉江人順治甲午舉人授安慶推官精於

懷寧縣志

卷十四 名宦

五十二

吏事民無冤獄己亥攝郡篆會海氛告急沿江諸郡縣望風披
靡安慶震恐熙績決計戰守有持僞檄至立縛置獄中人心始
定迨大兵會勦復率各營水師邀擊之以功擢刑科給事中世

襲三等阿達哈哈番

本府志

賈壯字止庵河南襄城人順治丙戌進士授懷令招集流亡惠
通商賈時滇黔閩粵未靖金聲桓擾江右楚豫寨氛竊發懷爲
八省孔道供億繁劇壯隨宜措置耕市不驚丈田均畝令民自
上其冊以免煩擾間加抽丈尺寸不欺兵火之餘首修學校文
治聿新輯懷志以存掌故萬事草創大造於民報最擢戶部官
至僉憲

馬剛河南睢州人進士順治十六年任縣事以廉慎勤能爲治旌揚善類百廢具舉康熙七年戊申猶在任大興學校重建大成殿明倫堂遺愛在民立祠以奉之久而不能忘云補

張君弼山西襄陵人舉人康熙乙丑授懷令蒞任三載恩膏浹洽以江西漕艘覆溺挂誤皖人作去思詩復臚其事實刊布流傳題曰甘棠遺愛建祠署東祀之

崔宦奉天廣寧人貢生康熙乙卯任懷令時兵氛未靖舟車絡繹宦戴星露供億行間一不擾民寬驛遞均保甲代貧民之房稅設饑民之路糜善政不可枚舉宦體清用儉接物和平士大夫樂進讜論小民亦得自言其情科條簡易窮谷周知修葺學

宮遇士有禮任七年陞永平同知去皖人爲立去思碑

劉效曾字東臬湖廣潯江人貢生康熙庚午由教諭擢懷令大書一聯於儀門有不愛錢不徇情不惜官不沽名之語上官以治行第一薦特賜袍服尋擢代州牧效曾設義塾於縣治前課士皖人名爲潯江書院後卽以爲祠祀之繼其後者爲王清圖正黃旂筆帖式三十七年任懷寧知縣和平慈厚不愧民之父母云

張懋誠字存庵四川遂寧人父鵬翮諡文端曾任安徽學政懋誠舉人康熙甲申授懷令單騎履畝載酒勸農廣立社倉親制保豐七則勸民勤儉庚寅修院城他官估工約四千餘金巡撫

葉九思以屬懋誠費纔一千六百元重葺學宮書院新大觀亭
創更上樓澄清堂於其間以時課士爲懷請復學額永定爲例
纂輯縣志粲然可觀後仕至通政司

沙琛字雪湖雲南太和人舉人歷任懷遠霍邱建德令攝六安
篆嘉慶癸亥署懷令是年夏六邑童生應府試以觀優大譁臬
使珠隆阿將發兵捕治得琛諭解築廣泰圩長堤淥水鄉二十
年無潦事詳本志水利尋以霍邱案謫戍五州縣士民奔叩撫
轅贖金代贖事聞恩予開復免其贖緩使得歸養焉

牛映奎山西徐溝人舉人嘉慶甲戌由巢令調署懷篆冰操自
勵釜甑生塵鄉民嘗餽薪米以繼其乏是年旱倡捐平糶臨去

時餘二百金存爲公費已無私焉海升穎州知府道光乙酉卒
於官

鍾于序字東澤溧陽人舉人康熙中任府學教授少負文譽爲
時名宿樸誠和厚有古君子風

本府志

程一桂休寧人順治九年任懷寧訓導捐俸修學宮聞變守城
陞江寧教諭繼之者東流人黃雲會八年任事捐俸修學樸誠
有師範

解詵字羽豐揚州興化人貢生順治時爲安慶府學訓導性情
藹摯士樂造其庭有貧者輒資之教士以敦本務實不苟同流
俗知府李士楨增修學宮詵與有勞會以憂去士子祖餞江干

至有泣下者

本府志

王雲龍字雲從涇縣人舉人爲懷學教諭教士以敦品制行士皆化之無敢毀方躍冶康熙乙卯卒於官

成梁字二鴻無錫人舉人爲懷教諭立品高岸與人和平經術湛深爲時名宿請建學宮大觀閣身任勞勩既去職諸生銜其教澤築九如堂以居之自號澗陽子

夏乾御字成六蘇州人舉人署懷教諭文章淵博意氣亢爽舉月課培士氣令有與士齟齬者乾御力爭之令亦感悟丁艱去服闋補江都教諭懷人士過揚者猶執經請業焉

李挽河字萊馭江寧句曲人制義暨詩古文梠極理要諸子百

家各手錄成編鐸隱來皖訓課多所成就暇則蒔花種竹弄月吟風意洒如也年八十無疾卒於官巡撫于成龍親臨哭奠皖人士歎梁木之壞焉生平著述甚富有蓆居書義蓆居詩義及半榻草堂諸藁行世

劉豐穀揚州人廩貢生性情渾樸不露圭角不立崖岸終日坐對使人蕭然意遠凡始入學者教官常態必計其贄之厚薄獨豐穀不然卽鄭老酒錢不繼處之廓如也康熙庚子卒於訓導

署中皖人士咸爲淚涕

以上道光志江爾維分纂

陶澍字雲汀湖南安化人由翰林改御史道光元年擢安徽布政使庫欵虧空五歷清查未得要領澍悉心鈎考分別應劾應

賞應豁於是三十年轆轤渙然一清因奏定章程嚴交代禁流
攤裁捐款俾有司得專力治民三年就遷巡撫是年水災瀕江
三十餘州縣田廬漂沒區畫周至民抄流亡奏設豐備倉於各
屬鄉村秋收量力捐之不經吏役不減糶不借貸不出易歲歉
卽全散之樂歲再捐奉請創修安徽專志十年督兩江薨於位
贈太子太保謚文毅入祀賢良並江南名宦

江忠源字岷樵湖南新寧人舉人累戰績官至湖北按察使咸
豐癸丑命幫辦江南軍務以援武昌功巡撫安徽疏請增兵萬
人又念行省新改廬州爲南北關鍵恐去遲賊且北竄遂以二
千人先發而湖北強留忠源所遣援兵於是勢益孤抵六安適

舒桐告陷士民遮道請留遂入城繕守備人心稍定而廬州警
報日夕至知府胡元煒具言城中軍實裕團丁可萬人請速往
忠源遂自率數百人入城元煒來謁詢守具以方籌畫對實無
一有越二日賊大至城周二十餘里合主客兵及團丁裁三千
屢突出殺賊輒數十百人堅守逾月賊氣奪將遁而元煒勇目
有徐淮者以城中食乏軍火且盡告賊且置梯南門賊緣以入
左右欲擁忠源去曰且戰且退以待濟師忠源不可初忠源之
至也官民婦孺皆歡呼多相從以入至是忠源不忍棄之而獨
生日吾何面目對百姓掣佩刀自刎左右持之一勇負以行忠
源嚙其肩及耳血淋漓勇創甚委忠源於地賊逼轉戰至水關

橋被七創憤投橋下死之事聞天子震悼追贈總督賜祭葬予諡忠烈祀安慶省垣忠義祠

李孟羣字鶴人河南固始人進士卽用知縣累戰功擢湖北按察使咸豐七年壽春鎮總兵鄭魁士兵潰於桐城巡撫福濟獲譴命湖北撥水陸軍協堵廬州官文胡林翼乃奏稱孟羣謀勇素優最利行陣令督二千五百人裹糧援廬州授安徽布政使孟羣道出英山復其城髮逆糾捻匪肆擾於皖豫之交孟羣派兵援勦八年英山羅田逆竄商城擊走之時侍郎翁同書巡撫安徽未至以孟羣署巡撫事駐軍店埠三河逆衆乘虛陷廬州奉旨褫職留營自効九年二月駐軍官亭長城一帶以堵廬州

西面賊由六安來撲奮力堵退復大股猛撲自辰至戌賊來逾衆擁入中營猶持戈屹立大呼手刃悍賊三名力竭被戕得旨優卹其忠骸藁葬廬州千總沈國泰深入賊巢覓獲與練總褚國泰護送回籍

曾國藩字滌生湖南湘鄉人道光戊戌翰林歷官禮部右侍郎咸豐初粵逆竄長沙以丁母憂回籍奉特旨幫辦團防七年丁父憂復奉詔墨經視師九年駐兵撫州兩湖督官文與胡林翼奏請援皖進駐宿松時湖北軍道員蔣凝學等已進駐荊橋多隆阿已由太湖進克石牌僞城國藩至會攻太湖軍心益壯十月鮑超督霆軍五營截小池驛衝要營甫立而賊圍之數重死

者十六七十年正月諸軍合勦寔軍存者始得突圍而出遂奪小池驛太湖守賊夜遁鮑超假旋養傷並檄增募川勇三月多隆阿進駐桐城掛車河官文胡林翼請以卽用道曾國荃視師安慶掘長濠二道以困賊四月授國藩兩江總督充欽差大臣渡江進駐祁門以朱品隆所部三千人隨行時值蘇常新陷浙省再淪乃以幕僚浙江溫處道李元度調皖南道招平江勇三千駐防徽州初徽防兵皆禦賊於要隘守山而不守城及元度至無所部署但云徽防兵皆不能戰徒糜餼爾吾平江勇一可當百月餘而警報日至徽防將弁官紳請防山不允請授機宜方略元度曰運用在乎一心非公等所知忽隻身遁去所部勇

大掠歙休而潰徽州遂陷祁門大震江楚皆驚營務處李榕請退營江西省城以保餉源國藩曰吾初次進兵遇險卽退後事何可言去此一步無死所也堅守兼旬飛檄張運蘭以老湘營至力戰猶不能支適鮑超以寔軍新舊七千人至偃旗而進賊猶迎拒及近乃張其旗賊見寔軍字號皆返竄始一戰驅出羊棧嶺追至青陽未幾僞忠王李秀成遣大隊由常山玉山經婺源至景德鎮寧池賊酋僞匡王賴文鴻僞奉王古隆賢率悍賊由建德至浮梁兩路包抄祁門恃景鎮一綫運道至是斷絕復檄寔軍西擊而賊始退寔軍東還十一年正月賴古二酋復率悍賊由大赤嶺入歷口直撲祁門國藩令朱品隆唐義訓率所

部親兵護衛營出禦李榕持不可力請退軍江西境越一宿而賊已距城十里許矣二將遽出戰大捷斬馘甚衆賊始回遁無何而賊復有景鎮浮梁之舉再檄霆軍敗之自是霆軍追賊江西境內率聞風飛遁未嘗見戰三月移駐東流左宗棠奉命幫辦軍務破賊於樂平僞英王陳玉成由斬黃回竄至安慶僞璋王林紹璋僞玕王洪仁玕由桐城上竄冀會陳逆以解安慶之圍多隆阿居間擊之擒斬萬計僞定南主將黃老虎又由蕪湖糾合捻匪數萬至桐仍擊走之陳逆與桐城援賊不能相合國藩復調霆軍渡江會勦陳逆夜梟水下遁留集賢關外赤岡嶺四堅壘與關內近濠之十三壘相與死守國荃掘長濠斷十三

壘歸路盡坑之其四壘則霆軍殲焉八月朔收復安慶越日國藩入安慶其時多隆阿已克復桐城追勦援賊於宿松黃梅蘄州廣濟各州縣盡復其城楊載福亦遣總兵王明山黃翼升率水陸各營克池州復銅陵十九日水陸合攻無爲州克之九月拔運漕鎮及東關十月授協辦大學士命兼轄浙江全省軍務同治元年三月提督鮑超攻克青陽石埭太平涇等縣城同知曾貞榦復繁昌會水師克魯港進復南陵縣城江蘇布政使曾國荃回湘募勇至是率水陸各軍克復巢縣含山和州三城攻奪裕溪口西梁山要隘駐防徽州福建臬司張運蘭收復旌德鮑軍亦克復寧國府兵部右侍郎彭玉麐與曾國荃率水陸各

軍克復太平府蕪湖縣攻奪金柱關東梁山各要隘三年以曾國荃克金陵賞加太子太保銜錫封一等侯爵世襲罔替六年授體仁閣大學士七年調任直隸八年授武英殿大學士九年八月兩江督馬新貽被刺江南人心惶惑因命回任兩江十一年二月薨於位遺疏入上悼惜晉贈太傅予諡文正省垣建立專祠

李續賓字克惠號迪菴湖南湘鄉人咸豐三年羅忠節澤南募勇殺賊續賓往佐之所練鄉兵號湘勇以大戰田家鎮覆賊巢授安慶知府歷官至浙江布政使七年平九江加巡撫銜許專摺奏事命勦皖詔將軍都興阿總兵鮑超率馬步軍由宿松趨

安慶續賓由英山趨太湖乃令其弟續宜駐軍鄂渚自率八千人啟行議者謂宜益兵爲四翼而自帥中軍五路並進續宜以餽餉難之會國藩奉詔墨經起視師與續賓會蘄州續賓遣將朱品隆唐義訓分千人爲之衛續賓抵太湖適署皖撫李孟羣師潰廬州諭續賓及都興阿改道援廬續賓謂必取太湖掃桐舒乃可趨廬八月復太湖潯山遂乘勝克桐舒令總兵趙克彰率兵守桐又命副將謝永祜守舒於是所部僅五千人九月二十八日進抵三河集先是續賓克桐城而都鮑及副都統多隆阿所部馬隊已趨安慶約續賓須俟復安慶乃進勦續賓不可三河集者廬州要害也賊築僞城傅以九壘悍賊數萬守之十

月二日攻破九壘斬馘數千或云環壘地皆浮沙踐之陷蹀賊
又徧取民間鍋埋置其中至戰馬足踏鍋皆破陷不能移步戰
輒不利忽僞英王陳玉成自江浦六合率大隊來援僞侍王李
世賢自廬州糾捻匪來援衆十萬連營金牛鎮白石山等處烽
火亘數十里諸將議退守桐城續賓曰軍事有進無退當死戰
飛檄防軍來援未至初十日大霧賊衆抄擊副將劉神山參將
彭友勝遊擊胡廷槐鄒玉堂村延光等先後死戰續賓傳令堅
守無何各壘皆破續賓上馬開壁馳擊殺賊數百夜二鼓總兵
李續燾副將彭祥瑞率屬衝出賊遂踞其壘決河隄斷我軍去
路續賓知事不可爲乃躍馬入賊陣死之知府何忠駿同知曾

國華董容方知州王揆一知縣楊德閻從九品李續藝張溥萬
皆殉道員孫守信運同丁銳義死守中右營越二日陷沒事聞
天子震悼贈總督賜祭葬予諡忠武省垣建立專祠

汪廷珍字瑟庵江蘇山陽人少孤貧力學乾隆己酉一甲第二
名進士擢授國子監祭酒再遷禮部侍郎督安徽學政爲學約
五則以訓士一曰辨塗謂喻義喻利人心之分盡於此爲己爲
人學術之分盡於此有志者當辨乎毫釐千里之差一曰端本
謂士者四民之首天下事皆吾分內事也自公卿至一命之吏
皆讀書人爲之故貴通古今達事變相期爲有體有用之學一
曰敬業時文者古文之一體猶之碑記傳記表疏論序云耳以

摹擬剽竊者之不足言文乃並時文而小之過矣一日裁僞昌黎論文惟其是吾論文惟其真蓋必能真而後是非可得而論也申韓莊列異乎吾道者也而朱子謂先有實而後託之文非以其真邪一日自立文之不能不變者時也挽其變而歸之正或因其變而愈益神明於正學者事也苟非克自樹立隨風氣爲轉移取已陳之芻狗沾沾倣效之庸有冀乎哉其因文見道如此每訓士諄諄然如父兄之誨子弟刻試牘曰立誠編取修辭居業之義也附條約十八則抉摘至爲精密其後督學江西及浙江亦如之嘉慶十三年特命爲總師傅時成皇帝在潛邸盡忱啟迪登極後獻納尤多官至協辦大學士加太子太保薨

賜祭葬謚文端所著有實事求是齋詩文集

車克慎字意園山東濟寧人道光己亥督安徽學政訓士以讀書明理爲務嘗言士可百日不作文不可一日不讀經日日讀經則書味深長不作文而文自工不作書而書自妙不矜言敦品而品自高矣

孫銘恩字蘭檢江蘇通州人道光乙未進士咸豐三年以兵部右侍郎官安徽學政駐太平府時髮賊由太平退踞金陵纔七閱月城無居民銘恩至卽招士民歸城爲團練保衛計自矢孤忠誓不他適倡捐千金募勇百名自是士民陸續歸來戶出一人晝夜各持軍械梭巡協力守禦四年二月扃門課士獎勵殷

拳日聞賊兵舟行上下過境紛紛人心震怖銘恩坐鎮不驚四月二十八日賊大隊抵城鄉勇民團勢不能敵倉皇間有欲負銘恩出走者銘恩叱之朝服坐堂上賊至厲聲痛罵拔佩刀自刎賊奪刀縛至船公復奮身赴水賊挽起縛送金陵僕范某隨之同不屈死

張熙字字玉田四川峨眉人進士咸豐初官安徽按察使清潔自矢多惠政哀矜折獄境無冤民課試書院進士子誨之諄諄如家人子弟壬子冬粵逆有警報大吏議守小孤門戶無人適往熙字毅然任之與之兵二百及癸丑正月賊自武昌水陸夾江而下衆五六十萬熙字所部不戰而潰省垣陷遂逮問嗣後

巡撫周天爵李嘉端奏請改建省會於廬州距安慶三四百里賊乘一江之便揚帆上下飄忽不測無敢過而問者而安慶士民紛紛赴廬乞師且云保安慶乃可固廬防否則我能往寇亦能往省會何所遷乎七月嘉端始遣熙字來守集賢關與之廣東及安慶兵五百熙字既帶罪不敢辭至則召邑紳募勇始集得數百人忽有河南股賊竄太湖突至縣境之洪家鋪意蓋圖據省垣聞官兵駐關不知虛實未敢遽進熙字乘其立營未定疾馳督勇四面兜勦盡殲之以功賞六品頂戴八月僞翼王石達開由金陵挾悍賊數萬上犯始踞安慶熙字以兵單一不足以當百請濟師九月益以陝甘兵五百人以總兵恒興統之恒

興率二百五十人先馳抵關立營未定而賊首秦曰綱復大股繼至與石逆合尤爲凶悍二十七日天未曙分三路來攻先發左右伏兵東由棗園石灰坳二路西由且記嶺石門湖二路皆抄出關外斷我兵歸路然後當中三路齊撲此番廣東弁兵義勇若出天性熙宇復激以忠義我兵無不一當百鏖戰自辰至申殺悍賊數千計賊更戰迭休愈接愈厲官兵精力疲竭攻南不能敵北忽賊從後路抄出重重圍繞四面還攻兵勇死亡殆盡恒興遂先遁熙宇拔佩刀自刎有勇目馬聲發奪其刀負之以行率銳勇葉金王等數人且戰且退刃悍賊數十百計始拔出重圍熙宇投塘水勇自後掖出之勸奔廬州圖後效先是熙

宇慮兵單欲輔以鄉團略無器械民有言賊遺巨礮江干者熙宇遣員督運以來比至其處則桐城文生張勳亦率練勇往取委員爭之不能勝回白其事熙宇怒增勇斥勳奪取之勳以是銜熙宇及戰敗賊進陷桐遂犯舒在籍督辦團練侍郎呂賢基在舒行館勳憤桐城之陷讒熙宇聞警先逃賢基據以入告遂殉節奏帶司官刑部主事朱麟祺接戰陣亡賊遂犯廬州當事遂相與諉咎於集賢關之不守奉旨張熙宇恒興皆正法熙宇已先自盡會巡撫江忠源至廬州知其冤欲申愬之廬州旋陷不果熙宇學行純粹官皖時有德於皖皖人士聞熙宇敗迄今猶爲之出涕擬請立慰忠祠於集賢關側

何桂珍字丹畦雲南師宗人道光戊戌翰林年甫冠廣西盜起數抗疏言軍事得失論前大學士某前總督某誤國不宜發軍前疏留中天下想望風采咸豐四年五月出爲安徽寧池太廣兵備道時安慶久陷改省會廬州仍被踞巡撫福濟提督和春軍廬屬之店埠桂珍所治在江南阻於賊巡撫遂疏留江北檄募勇隨征而不與之餉久之得二百餘人率以西至霍山號召鄉兵得三千有奇激以忠義以十月二日破李兆受於霍城東追擊至麻埠又五日至流波疇兆受者河南捻魁也有衆數萬至是爲桂珍所破檄商城固始諸團丁扼歸路而自率所部進追捻黨大魁相繼降散脅從萬計百姓懽呼餽糗糧不絕先是

巡撫檄桂珍援廬江檄未至廬江陷竟劾之落職軍民皆不能平會侍郎曾國藩督楚師克武漢大破賊田家鎮遂圍九江桂珍通牒楚軍言狀國藩具疏於朝副都御史袁甲三時軍臨淮亦欲資桂珍兵西與楚師會至蘄水矣爲地方吏所尼不得前居無何九江軍失利武昌再陷國藩入江西遂斷絕不相聞桂珍孤軍轉戰霍間五年正月克蘄水旋克英山殫悍酋田金爵巡撫檄桂珍駐英山然桂珍任事八閱月支見銀三百兩不足供一夕炊民兵相從日多又益以兆受降卒無所得食初人日餉麪一斤遞殺至四之一猶弗給五月十一日師遂潰方兆受之降也桂珍請縻以官秩於巡撫不允至是絕糧意不能無

缺望徒感桂珍忠誠不忍背無何兆受黨馬超江爲土人所殺兆受顛桂珍拘其仇弗肯益大恚則設位哭弔捻黨麋集於是院豫諸帥爭以兆受反狀聞榜於衢購兆受頭千金兆受詣桂珍自陳桂珍推赤心拊慰之爲請於巡撫釋其罪以觀後效月餘無批答兆受心甚懸懸晨夕覘伺密置心腹環桂珍駐所會巡撫以密書由步遞遣鄉農達桂珍屬先發制之書爲兆受得謂桂珍賣己也遂以十一月三日伏兵戕桂珍於英山小南門焚其尸颺之年三十有九從死者四十七人同治三年秋江寧克復逆渠盡殲國藩始疏陳桂珍率鄉團勦賊時飢餓艱危歷人間未有之苦卒爲叛人所戕顛請加恩旌卹得旨賜祭葬

予謚文貞建祠英山給騎都尉世職

李文森字恕皆貴州鎮遠人道光庚戌進士以知縣揀發奉天曾文正國藩時督兩江勤求吏治奏調來皖以知亳州擢穎州府遷皖南道權臬篆多所平反纍囚佛祝文森所至必以培養人材爲務每課試書院文行交勉剴切有條多士悅服時教匪猖獗有所挾持以脅地方大吏鬼蜮百出甚或以兵相劫文森不激不隨惟與士林日講正學令曉譬居民以綱常之義動其忠孝之良文森爲人剛毅磊落能任大事遇事推赤心於人腹中略無城府上不諂而下不瀆遂以此見忌於權貴解任陞見發往雲南以道職候補滇黔督張亮基新拜命以文森深明韜

略且悉輿地形勢方倚爲左右手而文森遽沒於長沙舟次無子以兄子爲嗣老母八旬暨兩兄眷屬皆在皖至無以爲衣食計藉同官轉贈始得歸皖人請祠名宦以爲傷廉吏之難爲思遺直而出涕蓋實錄也

陳濬字心泉福建閩縣人道光丁未進士江西遺缺知府補南安江督曾國藩以安徽省垣初復遺黎凋瘵奏調補安慶濬廉靜自持與民休息乃作勸士要語四條曰安貧篤行勤學勸善又有戒訟五條曰惜財修睦達觀簡詞守法凡所訓戒莫不仁言藹如小民舊俗頗染僧尼巫鬼之習濬於兵燹之後一意遏絕不使萌蘖其間惟知民義是務實事求是在任三年民氣爲

之一蘇時新設安廬滁和道員缺遂膺簡擢濬創立規條簡要不繁事舉費省繼事者深規隨之思焉濬清操自矢不能苟悅取容在道任年餘一權臬篆旋獲咎解職署兩江督李鴻章知其賢爲之請復官卒於武昌道任所皖民追思之

劉韻珂字玉坡山東汶上人嘉慶癸酉拔貢由刑曹擢知徽州府十一年調安慶府簿書案牘所滙大府倚之如左右手自朝至昃不遑暇食爲人質樸肫誠任事懇至安慶承上年積潦之後至夏水益大漲楚吳數千里濱江無人煙環城內外郵亭墩堡叢祠墟墓之間男婦老弱填塞無所容皆延頸望澤故事官賑大口三爲率小口五爲率冬賑二春賑一韻珂謂不足以濟

乃與署知縣金石聲遴敦善之士各勸樂輸於其鄉而先捐清俸以倡之於是七鄉共得萬餘金繼官賑之後起明年三月盡六月賑飢民十三萬二千五百餘口金不足至典售其眷屬服飾皆盡其冬捐給棉襖袴數千領皆其妻督童婢自爲縫綻故皖民得還定以安其居尋擢雲南鹽法道皖人屏營罔措若赤子之失慈父母士民相與泣於野爲詩以送其行有云納稼千村畢炊杭百里香昨年此時節哀雁正淒涼粟向監河貸衣教織女縫朽株看漸活辛苦是春風勤苦期年詠馨香百世思如何竹王國將我召棠移南岳銘恩重江波紀澤深臨行無以贈一片皖人心後官至浙閩總督告歸田里猶從事於隴畝有人

遣僕以書投韻珂至門首見一老翁持耕鑿具問曰此間有劉制府大人者安在翁曰此其居命隨之入始知其卽韻珂也郭世亨字梅卿浙江蕭山人順天籍由翰林院庶吉士散館選太平縣知縣旋調懷寧伺應繁重猶關心民瘼勤求治理興利除弊見義必爲聽斷明敏不矜聲色而剖判無爽銖黍嘗有村農入城市擔田糞值細雨泥滑顛而微覆於衢適當涇人衣鋪前涇人叱農挑水於江以洗道至數四旣淨矣猶喝令解衣以拭時值隆冬農拒不允適世亨經其途涇人白焉曰請飭拭之世亨曰然飭農解衣以拭農淚下不肯解世亨曰若衣蔽極矣着之不溫速解之農不得已且泣且拭世亨問涇人拭已淨否

曰淨矣問農冷否農叩頭股慄曰冷甚世亨指涇人謂農曰伊鋪裘甚美且多爾試自取袍一行褂一着之便煖也世亨俟其着畢喝令擔其擔以去觀者咸笑而稱快其溫以厲類如此皖人有神父之頌

薛暄黍字蓺農全椒人道光丙午舉人同治六年由英山訓導遷安慶府教授胸次高潔不與時流爲伍而訓課勤懇士心歸之數載卒於官繼之者爲盱眙張承慶字善夫道光己酉拔貢生由巢縣訓導遷授斯缺承慶學有本源立身清介其副不廉而悍承慶絕不與爭凡所朘削絲毫不以染指在任未及一年病卒郡人士悼惜之

平源字沛霖浙江山陰人順天籍咸豐二年十二月署理典史三年正月城陷獄囚聞警欲亂源親往彈壓賊至縱囚源叱之被戕欽差大臣提督向榮奏聞賜祭葬銀兩給世職祠昭忠

以上

同治志舒
卓元分纂

曾國荃字沅甫文正公之弟也道光二十七年舉優貢咸豐六年募勇三千人援江西克安福進攻吉安戰屢捷明年丁父憂廣昌樂安賊聚吉安湘撫駱秉章豫撫耆齡會奏起國荃統吉安各軍八年八月克之江西全省肅清撤軍遠湘寇復至國荃復出敗賊於景德鎮江西再肅清十一年四月賊踞集賢關築壘十三公掘長濠困之石牌賊分黨襲屯後力戰六晝夜攻破

城外三壘及菱湖兩岸壘先後擒斬數萬城外賊營俱盡八月
丁巳朔克安慶乘勝東下九月薄廬江奪泥汊口神塘河賊壘
下無爲克運漕東關浹旬之間連克城隘同治元年二月率新
軍六千至自湘循長江北岸北岸賊壘悉平四月引軍南渡南
岸賊壘悉平五月進屯金陵雨花臺自江南大營以兵七萬屯
八年卒潰退國荃合水師不滿二萬文正以軍孤懸未可輕進
屢議退國荃不可二年九月克秣陵關三年正月克鐘山石壘
五月克龍膊子山陰堅壘六月十六由地道轟城入生擒李秀
成洪仁達於僞天王府焚洪秀全屍獲小天王洪福金陵克復
光緒十年授兩江總督初至江南值法人啟釁在吳淞江陰設

三礮臺布置嚴密江防以固十六年十二月二日薨於位年六
十有七封一等伯爵加太子太傅追贈太傅諡忠襄

李續宜字希菴湖南湘鄉人從其兄續賓討賊江西湖北積功
洊擢道員咸豐八年續賓殉難三河續宜在黃州收集潰卒接
統其軍自鄂援湘解寶慶圍十年東還授安徽按察使駐軍懷
寧桐城之間曰青草埔者大敗逆酋陳玉成於挂車河賞二品
頂戴十一年擢安徽巡撫調湖北命駐湖北安徽交界督辦軍
務旋復調撫安徽同治元年命幫辦勝保軍務時髮捻合圍穎
州府已數月續宜駐師臨淮派提督成大吉總兵蕭慶衍渡淮
援剿穎圍解派道員蔣凝學攻克霍邱剿撫各圩陰散逆黨選

任賢吏安民墾田功緒漸彰命爲欽差大臣督辦事務旋丁母憂疏請奔喪甚力賞假百日回籍治喪途次病二年十月卒諭照總督軍營病故例賜卹並於湖南湖北安徽省城寶慶府城湘鄉縣城建立專祠賜諡勇毅三年金陵克復恩賞續宜子光英直隸州知州

本省志

彭玉麟字雪琴湖南衡陽人年十六投協標充書識衡陽知府高人鑑奇之使入署讀書又二年始隸諸生籍道光末從協標大軍擒李沅發於金嶺上功總督誤以爲武生補臨武營外委玉麟辭歸曾文正治水師於衡湘求奇士常儀安薦玉麟有胆略水軍立以玉麟與楊載福分統咸豐四年有湘潭之捷尋復

漢陽武昌羣寇下保田家鎮連舟斷江纜以鐵索大鎖布木爲筏置大礮焉玉麟麾師船掠斬直下擲炬燒筏二舟俱燼山上賊亦顛越坑谷屍相籍由是湘軍水師名聞天下八年湖北水陸軍下圍九江攻湖口賊扼石鐘山置巨礮當我船之衝內湖外江不能合玉麟泣曰不渡此險終無生理遂鼓擢赴之賊礮乍裂於是與外江合陸軍應之進奪小姑山復彭澤遂克九江十年曾國荃攻圍安慶陳玉成率賊三萬來援玉麟叛立飛划營合陸軍大戰遂克安慶上授玉麟爲安徽巡撫玉麟上疏三辭奉旨改提督復改兵部右侍郎同治元年復蕪湖陸軍進攻秣陵關玉麟率水軍由烈山赴之奪江心州蒲包洲進泊金陵

護城河口二年五月破九洑州於是金陵僞都糧絕六月克江南乃與文正奏定長江水師之制自荆岳二州至崇明縣五千餘里設提督一員總兵五員以六標分汛營哨官七百九十八員兵萬二千人自餉雜皆取給長江釐稅不煩戶部及玉麟回籍終制水師規制浸弛弁勇橫行詔玉麟復起視師玉麟一出効罷營哨官百八十二人於是江湖肅然旋入覲命每年巡閱長江專摺奏事光緒七年法越事起命赴廣東省辦理海防規畫周詳法人不敢近無何和議成罷兵玉麟累疏乞休皆慰留至十四年始開兵部尙書缺巡閱長江如故又二年卒年七十有五謚剛直善畫梅海內傳者萬本云

英翰號西林薩爾圖氏滿洲正紅旗舉人咸豐四年以知縣揀發安徽歷署合肥鳳臺霍邱宿州及鳳潁同知事先後破平台肥賊壘收撫宿州賊圩各數十處同治二年在宿州任內又收撫劉天福李勤邦劉天祥張慎德王鳳潮羅克有侯泳固及生擒巨捻張洛刑并其子張喜升補潁州知府加道銜苗沛霖叛圍蒙城率軍赴援攻克丹鳳集連破賊踞之穆家張蔡等圩又擊退濁溝之賊署廬鳳道接統蒙亳諸軍攻澮北賊圩破之復派軍助守蒙城別克高爐集斬捻首高加苗逆攻撲小澗集渦河南北營潰復會軍疊破賊圩斬逆黨慕玉宗奉有英翰在院素稱得力令認真防剿之諭旋隨僧忠親王分路進攻苗逆伏

誅升授安徽按察使率軍扼雉河奉檄越境解湖北麻城之圍
追賊六安霍邱間克金家寨緣前事被議奉硃筆改爲降五級
留任旋升布政司派軍敗賊於土門河楊柳灣漫水河黑石渡
收降黃中庸等三千餘衆僞天將馬永和兵事作馬融和擁衆數萬乞
撫爲僧忠親王許之時潛太英霍肅清賞給鏗僧額巴圖魯勇
號四年賊陷高爐集團攻雉河英翰時在圍中夜率二十八騎
突出至蒙城率援軍由果家圩李家樓進克高爐集會軍破賴
汶光牛烙紅等於渦南破張總愚任柱等於渦北雉河圍解自
是破賊於王家橋於黑虎廟於近仙店於大蔣莊於烏龍集五
年賴逆等竄潁州會軍由大橋集進剿追奔至薛店逆復走宿

州竄懷遠渡渦掠下蔡又迎擊於陶王集棗木橋均大破走之
升安徽巡撫布置各處河防六年派兵四千人援陝西簡精銳
萬人赴山東會剿丁父憂疏請守制奉諭墨經從戎改爲署理
巡撫督軍馳赴運防敗賊於宿遷匪首劉漣張淙張鳳山蔡志
誠謝得洸王瀛等先後投誠復於盱眙擒獲僞衛王李允正法
皖境肅清疏請回旗終制時張總愚竄擾畿南奉旨將此股賊
衆蕩平再行扶柩回旗遂親督將士會湘淮各軍困賊於黃運
間事平賞太子少保銜輕車都尉世職八年穿孝假滿回巡撫
署任是秋安徽水災籌款賑濟並借給各屬修圩經費九年服
滿奉旨實授自此至十三年先後拏獲蕪湖匪犯蕭國典合肥

劉孝窩子蒙城邵錐子舒城周炳和霍邱李昭仁張振科等共十餘名又於亳州擒獲捻逆宋景詩於廣德建平當塗擒獲孝豐竄匪彭節應李鳳岐呂和根趙錦源關雙淦金尙芝等數十名及首逆關汝漑均各正法而稽誅之捻首汪敦友粵逆偽輔王楊輔清則派員於河南福建擒獲之其剿除餘孽不分畛域如此光緒初升任兩廣總督因事落職旋授烏魯木齊都統卒贈太子太保銜賞還勇號花翎照都統軍營病故例從優議卹賞銀二千兩人參六兩以慰其母又奉諭加恩予諡並於皖省建立專祠英翰性至孝公餘養志如孺子其帶兵則罰必當罪賞恒浮於其勞故人皆願效死力事平以來培植士類歲費千

餘金爲敬敷書院優獎擇其英俊者親教育之至豁達大度推誠待物尤有古大臣風

本省志

吳坤修字竹莊江西新建人由湖南知縣於咸豐三年爲曾國藩所拔識隨營帶兵轉戰湘鄂江皖四省克復府縣城池二十餘處力抗湖口要衝剿辦院南踞逆移防無爲廬江蕪湖會克九洲各要隘洊保題奏按察使四年署徽寧池太廣道補安徽按察使五年署布政使轉輸饟餉興學校建廨署辦城防六年回任七年署巡撫時皖軍剿捻坤修駐壽州籌協前敵軍餉整飭營伍經理善後悉心力旋補布政司仍署巡撫九年回任整頓吏治綜理餉需勤催科籌賑卹鉅細躬親積勞成疾十

二年卒於官贈內閣學士銜廕子入監以知縣用坤修好讀書喜爲詩刻半畝園叢書三十種著三恥齋詩集十卷在任浚省城溝道置學宮禮樂器選諸生肄之建忠義節烈祠曾文正專祠奎星閣大觀亭振風塔鳩江書院及余忠宣李淳風墓皆捐資修之

本省志

陳彝字六舟江蘇儀徵人父嘉樹道光二年二甲一名進士仕至江西布政使彝同治元年進士亦二甲第一改庶吉士二年散館授編修假歸讀四子書歲餘三年還朝以抱甕名其齋閉戶不事權貴以文學名於時六年考試差得鄉同考十二年轉御史劾內務府大臣及侍講王慶祺直聲震朝右光緒元年巡

南城特轉給事中論福建電線鐵路事忤時相意出爲雲南曲靖府召對猶詢密疏中語也曲靖近蜀悍而善訟彝日自引問必判曲直而後已鋤豪右無所貸訟日以稀居三歲餘無訟上官累疏上考彝乞病不許乃以候選道歸未一歲粵督張樹聲奏調入粵中外亦交章論薦八年就拜河南開歸陳許道巡河之官腥羶所集彝獨無餘財上南廳某處隄素危議用栗毓美法爲磚壩未決而栗公降神於河壩緣几下行一匝爲壩形在事者皆見之中牟三堡河中沙積南北爲二渠十年春彝倍其隄及秋而北渠塞舊隄盡毀賴新築隄以免重建兼署按察使陝督譚鍾麟復以疆吏才力薦十二年遷湖南布政使二十日

擢安徽巡撫是年冬受事故事虞侯材官下及寵養悉廩於官
繇初上司事上請儉曰在官者仍之繇從私人養廉何用皆自
給僚吏意繇高峻難事繇和厚坦白無所更張所屬非大惡不
輕彈劾然一權攝一差除皆量其能竿牘無所售十三年夏霖
雨宿松蕪湖潛山江圩皆潰而懷寧桐城之廣濟圩當塗之大
官圩尤巨其秋河決鄭州潁鳳泗十二邑水明年廬滁天長復
旱繇奏開賑捐以候補道張保慈主之延上海協振所嚴作霖
輩携巨資來故鳳潁道任蘭生起軍旅有治行民畏而愛之繇
密疏特徵俾司皖北水災振事兼綜營務任卒以候補道錢祿
曾繼之疏沙淝入淮諸水築沿淮隄修復江圩丁壯工作老弱

就食創振課法以卹寒士當牛給種先後數百萬金皖北逋逃
藪河決已買刀劍矣聞發粟乃安大官圩工鉅勢不可復繇親
往勘步五六里民間乃歸創因利借錢局數十所安慶樓流所
合肥倉穀大通義渡凡利民者無不舉廣德徽寧伏戎不可數
彝命受盜符者官爲收之出其符王人也匿則殺無赦盜於是
散民尸祝之禱雨而應則曰中丞兩去官將三十年猶有設位
祠之者合肥參將劉文弼與族人閩臺灣撫劉銘傳張其事以
倡亂告大府及繇繇察知非叛僅遣一旅鎮撫之奏文弼褫職
逮捕而大府已舉重兵屠其鄉以亂定入告於是朝議謂繇不
知兵初繇特擢皖撫非時相意相有所屬又以事解職會大吏

某乞告在家子弟殺人某屬不竟其獄不許嗾言官劾其縣令
示意旨彝覆疏辨雪甚力十四年冬上遂開缺以三品京堂候
補既而上意解彝請交替命俟代者至十五年秋始謝事而其
夏已授順天府尹矣十六年轉宗人府丞十七年督浙學差未
滿二十年復以京尹召兩居是官皆值大水其救災如在皖時
而甲午乙未間倭人事亟邦人大恐檄辦車牛無虛日穀大貴
民無以炊官設肆三十所行平糶法二百年所未有也二十一
年遷內閣學士仍攝京尹事二十二年告歸二十六年卒於家
年七十四彝少孤力學於紛華勢利無所嗜咸豐初江南大亂
轉徙窮鄉幾十年以是盡知小民疾苦情僞而學亦大進合程

朱陸王爲一參之二氏以究其終始世俗利害禍福之說不一
動其心身致通顯而時事日棘隱痛於中而不能救抑鬱憂傷
殆無一日抒其懷抱屬疾數日有自京師來者訛言廢立改元
驚駭氣結遂不能食彝卒十二年而社屋矣又三年前江督張
勳奏彝功德在民清皇室賜諡文恪

本家傳

劉汝剛字聖思江蘇陽湖人寄籍大興道光六年以舉人大挑
知縣分發安徽歷知旌德懷寧建平休寧縣事其先後在懷寧
也結疑案數十捕逸盜胡和尚置之法民有夫婦買舟適楚其
夫爲舟人所殺擒治論罪又集資築廣德圩數十里升署六安
補壽州後被議落職貧不能歸留滯者數年後其弟與其里人

爲籌資接濟始得去

本省志

劉傳祺字小崧宛平進士由庶吉士改刑部歷官郎中出知寧國徽州安慶府事徽州當粵逆蹂躪之後撫綏瘡痍修舉廢墜營勇譁餉幾成禍變傳祺恩威並用得無事去徽日攀轅泣送者近千餘人在安慶十年務爲安靜休養士民陰受其福先後督辦災賑全活甚衆光緒元年升江安糧道以祖籍迴避改授徽寧池太廣道時規復蕪湖鈔關又添設通商口岸一切經始章程皆所釐訂積勞成疾卒於官

本省志

聯元字仙蕪姓崔佳氏滿洲鑲紅旗人由翰林侍講改官來皖守太平調安慶安慶故當省會監司皆位太守上以分相臨少

所建白聯元性亢直持正論不稍曲從於民間利弊體察周至雖愚夫婦街談巷議苟有當不惜舍己從之爲政以厚風俗正人心爲本尤能以至誠相感兵燹後士趨浮靡因事接見必以通經學古相誨勵其才而貧者輒爲之汲引不肖者亦必摘發其奸私痛懲之不稍寬假邑儒馬徵慶經術湛深爲列其學請獎於朝以勵多士光緒甲午軍興籌餉各督撫例增羨餘之獻謀稅市宅以益餉需聯元以朘削過深非政體陳說於大府事得寢軍旣解朝廷懲禍亂更新政下各直省責令施行聯元曰比歲國家多難人心不固只宜鎮靜養其元氣豈當復有動搖於是謹擇其便於國無害於民者少更一二其他悉仍舊制院

之人恃以無恐在皖凡十四年以廉直稱兩薦卓異兩權安廬
滁和道乙未除廣東惠潮嘉道既赴粵院人彙其德政紀於碑
以誌去思戊戌升安徽按察使入覲留京奉旨三品京堂候補
充總理各國事務衙門行走擢至內閣學士兼禮部侍郎銜庚
子拳變以直言與許吏部景澄袁太常昶同被害院人士聞之
驚痛設祭追悼事平復原官宣統紀元賜諡文直

彭廣鍾字筱川江西甯都拔貢令懷寧懷寧故省治有大府供
給奔走之煩令於民事素不暇理上官往往委吏之待缺者攝
聽之廣鍾至則以興利除弊爲己任獄訟必身親之遇小民怯
懦語言蹇澀必霽顏開問使盡其辭後黠者利用其術覲公矜

憐然卒能辨之也卽折獄小不當枉者輒曲諒之曰彭公必不
枉我或思省未至耳縣舊有廣濟圩常毀於水每歲夏令以例
巡視一日廣鍾至見圩有滲漉大驚急督居民塞之時雨盛江
暴漲塞之不可止廣鍾乃禮服跪隄上禱於神泥水漬衣履居
民感奮自厲隄卒以完光緒三年創建鳳鳴書院於豐備倉故
址暇日與多士口講指畫文風爲一振撥魏科入翰苑者遂踵
相接五年以疑獄見劾於彭剛直罷去士民倉皇走大府呼籲
不得往就剛直潯陽舟次要求亦不得幾如中路嬰兒失母廣
鍾去後民之苦於稅斂獄訟者猶追念遺澤爲之潄潄泣下也
唐瑩字子瑜太平當塗縣人以舉人得知縣不自信改教職選

懷寧教諭貌古穆寡言笑教人不苛而久則漸摩於人生平不揭旨言學言動取與必準於則所至有經師人師之目在懷衙齋蕭然雜蒔花木積書僅數簏喜讀史每終日危坐批校上方輒滿嘗受大吏聘修省志始終志事僅瑩一人故所成多出其手卒後諸生請於邑令譚廷獻作教思碑立於鳳鳴書院並奉主祀於書樓之東偏箸有謝家山人詩集六卷自訂年譜一卷

胡遠濟
分纂

黃鼎字玉耳六安人明季以黃州通判改陞河南總兵順治二年授安慶總鎮時兵火彫殘瘡痍滿目鼎極意拊循婦女之被擄者百計歸之陳元芳馬進寶二賊肆虐於皖進寶脫身歸順

懷寧縣志

卷十四 名宦

八十

元芳匿白牙寨鼎欲急洩民恨密遣將領擒而戮之通衢皖人寸鬱其肉歡聲震地進寶後亦以謀逆伏誅各營叛卒焚殺淫掠被害者以聞立置之法先是六皖鄉民多立寨避賊至是依山爲巢未歸農者甚衆鼎諭以禍福悉令解散災黎以安流亡復業鼎質性慈明英姿颯爽善御士卒嚴而有恩故人樂用命而跋扈之徒不敢逞居常延攬英雄以備國用座客常滿有古良將風烈妻鄧氏亦能軍嘗於白湖寨逐殺流寇有保全六安之功事聞封招討夫人本府志鼎所著有管窺輯要十八卷

卜從善在明以武功累遷至總兵官順治二年參將羅九武孫得勝等爲桐患豫王在金陵邑人奔訴王下令安桐從善奉命

領鎮兵至率營弁十餘人入城坐公署傳叛將議事縛詣金陵殺之遂散其卒伍民安堵如故五年土賊范大范二據桐之白雲岩宣言借餉搜括民財從善復率兵平之本府志

梁大用陝西安塞人年十五與兄琦應募從戎大將軍見而異之俾領諸卒以戰功累官至安慶副將初駐皖城時潛山諸寨未靖操撫李日凡題請由皖移鎮潛山統轄六邑大用至潛勦撫兼施以梅家寨爲天堂諸寨咽喉與兵備道石鎮國池陽總兵卜從善合兵破之殺僞監軍葛修懋僞遊擊夏勝重等二十餘人白雲寨望風降進克皖澗寨僞部院傅夢弼同衆僞職由後關遁飛旗天堂諸寨據險負隅大用攀蘿緣壁奮勇先登諸

將從之生擒僞將軍王坤基等旋平西關寨乃與知縣鄭適元入山開道盡掃賊巢潛民之竄伏流離者咸得復業稱樂土焉潛故無城大用建築土墻東南處兵西北處民紀律嚴明各不相擾在鎮九年陞湖州府副總兵都督僉事士民思之立生祠於三祖山麓歲祀焉

熊嘉夢字魁吾三韓鐵嶺衛人先世爲明威將軍父鑛殉難嘉夢時年十四事母至孝仗策從戎累戰功歷任總兵官康熙丁未以原銜鎮安慶統轄遊奇瓜三營次年增轄灤山營水陸千里伏莽無驚士卒凜奉約束與皖民雜處不知有兵以疾辭旋卒於官葬懷寧北集賢關內望城岡子麟及封以父廕受六品

京官子經成武進士仕至浙江黃巖鎮總兵官

本府志

韓世臣字容齋北直人由行伍任安慶協鎮軀幹雄偉智勇深沈在鎮五年清核兵籍整飭戎行奸宄屏息尤留心地方事民間利弊必力白當道興除之年近八十不廢騎射與皖紳耆爲香山宴遊以疾卒於署櫬歸傾國輓送

本府志

李世登字上融山西陽曲人監生由鳳陽衛千總調安慶衛守備能屬文善飛白書院丁嬰漕累多貧疲每僉運百計求脫至有逃亡者世登設法調劑丁力以裕樂効輓輸邑令沙琛創築廣太圩其地多屯田世登實贊成之方議抖甲贖屯已措貲未及舉行以事罷官卒於院世登豐軀偉幹饒有才略好古嗜奇敬禮文士與州縣接驩若友昆深爲上官所器卒之日惟有書數百卷無長物焉

陳敏政字星亭貴州黎平人武舉安慶後幫領運千總年七十能挽強兼工書法嘉慶庚午院漕截留易州易收漕胥吏素爲姦利量多逾制爲臺去地數尺迎風量米狼戾滿途幫官重違回空例限不敢久持因是虧漕係累者纍纍相望幫丁聞留易糧卽妻孥聚泣敏政毅然請於司漕大吏檄飭州牧較準官量吏以舊量至敏政左挾量右持吏將訟於倉場令副丁以船回繕棚貯米以待命聲色俱厲吏大沮喪量乃如制丁親執概自是宿弊一清各幫俱蒙其利焉以老休歸卒於家

以上前志江爾維分纂

長喜字怡亭滿州正黃旗人嘉慶間由閑散補鑾儀衛升治儀正放印務章京道光元年任安慶營副將訓兵輯民慈祥豈弟暇時習爲詩歌講求六書以自娛軍民交相愛戴民間有官如父母一文一武之謠一文謂汶上劉韻珂十年知安慶府事已見前傳在任十餘年兩署壽春鎮總兵官後升任乍浦都統死英夷之難迄今皖人謳思之

以上同治志
舒卓元分纂

多隆阿字禮堂蒙古正白旗人隸黑龍江部伍成豐初屬僧王戲下從破高唐州連鎮及馮官屯賊巢僧王由是奇之五年從都興阿援湖北克武昌漢陽復黃梅廣濟七年六月與鮑超克小池口湖北肅清未幾而九江復進攻太湖克之復從都興阿

公攻安慶平城外九壘賊勢已孤會李續賓歿於三河舒桐潛太復陷隆阿與鮑超拒賊宿松東北大破之軍威始振九年都興阿舉隆阿自代遂以皖事屬隆阿與鮑超攻太湖未下時曾文正駐宿松胡文忠駐英山同心謀皖以攻太湖各軍悉歸隆阿節制皖寇知官軍銳意東下大懼王成復糾合撚匪龔瞎子張落刑十餘萬衆來援隆阿撤太湖圍以鮑軍屯潛山小池驛當前敵移他軍爲後援已屯新倉爲援曾公胡公危之益發兵圍太湖援前敵賊圍鮑軍數重隆阿攻賊營以救鮑超自督軍護運道一卒持糒五升藥鉛五斤至壘擲而入又以己軍抽屯鮑左軍右代戍壘相持四十餘日大破陳酋斬級萬餘復潛山

太湖二城於是賊奔下游而江南大營潰曾文正渡江駐祁門
鮑超將八千人從戰院南隆阿將萬人戰皖北故文忠駐太湖
曾國荃圍安慶李續宜屯青草塢隆阿攻桐城寇倚桐城牽安
慶又知官軍精銳在桐城設守甚固城西北求兩嶺勢臨城寇
作石壘環以二丈石濠與磚壘水堡相輔隆阿躬率三千人出
嶺後陽列騎兵攻城夜半嶺後軍闖登寇馮壘以官軍不能近
雖據嶺上無益未之備公令三千人合築礮臺三比曉臺成礮
寇城壘在目寇驚以爲神功旋列隊移礮置三臺於是石壘
及城寇伏匿知困矣十月賊援桐城號十萬隆阿先屯掛車待
之陳曾增壘不戰公曰賊始至而閉壁此欲老我師也然以援

城爲名而不能戰寇衆心不能知其機而形勢已餒矣宜悉衆
合擊之破其一屯餘衆自走乃建旗鼓率十八營分三隊薄攻
之寇出戰敗還屯隆阿喜曰賊將走矣飛書告李續宜約夾擊
李軍進新安渡賊又不出數日突攻李營隆阿往援賊退隆阿
曰賊易與作戰可也請與共殲之遂分軍自掛車掠寇屯而北
李續宜自新安渡掠寇屯而南寇不能守則出戰兩軍奮擊俘
千三百人拔出難民萬四千平壘館百四十墜水死又數千追
奔二十餘里玉成乃走廬江陷蘄水蹂黃州上掠雲夢德安隨
狂奔千餘里欲掣動攻圍安慶之軍月餘還宿松至太湖諸將
曰急發大軍拒之隆阿曰賊新勝氣銳其來不攻我而亟戰以

怒之敗矣今皆保營寇疾趨入安慶復自挂車列隊耀兵而退隆阿曰此示假道不欲戰也然彼畏我甚宜示弱以誘之設伏兩山隘戒之曰賊敗必過東東起大呼西起應之過西東亦如之勿遮道勿留行令突騎數百躡賊曰聞呼聲而進追不得過十里親率羸軍誘寇寇進則走寇分二隊以大衆攻大營以少半追敗者至新安渡伏發斷寇後退者還擊之寇潰而東東山伏鼓而呼西山應之東西呼聲動天地追騎馳至寇大敗爭走攻大營者亦敗退皆走廬江李續宜旣上援湖北陳酋以青草壩空虛桐城圍軍不能遠戰復分三道來侵隆阿分五隊擊破之十一年六月賊大舉來刈稻隆阿大破玉成於高樓嶺又平

桐城外七壘一日公登轎車望曰賊衆十倍於我連戰皆敗今知吾所在夜必來劫營乃潛徙其軍賊至得空營大驚引去八月朔曾公國荃克安慶公策桐城賊必走留軍收城自要寇宿松先一日至寇方從潛山西趨遇官軍驚走黃梅馬步追奔四百餘里廣濟斬黃桐舒皆復同治元年拔靈州擒陳玉成誅之五月撫匪竄陝西詔赴陝西督辦軍務大破賊於紫荆關復其城十月回氛益熾十一月解同州圍一戰大捷回匪倡亂九閱月受創始此二年春馮翊悉平五月克交河口十三村賊巢連克高陵涇陽縣城及塔兒寨永樂店咸陽之渭城灣蘇家溝馬家堡白起營各賊六十餘處縱橫二百餘里伏尸遍野馬不能

行京兆亦定關輔肅清欲渡隴剿回匪而賊首藍天順陷盩厔
馳軍圍其城礮子中傷左目旬餘卒於軍同治三年四月十三
日也年四十有七累官至將軍贈太子太保諡忠武封一等男
爵

鮑超字春霆四川奉節人曾文正治團練招水軍拔爲哨官隸
楊載福戲下從克岳州平沿江賊壘抵金口克武昌漢陽及蘄
川田家鎮攻斷橫江鐵鎖焚賊舟武昌再陷超後胡林翼克之
上游江面一律肅清九年進規小池驛破七十餘壘克太湖潛
山一時霆軍名聞天下十一年李秀成擾江西連陷二十餘城
逼瑞州泰新靖安安義及省垣超援剿大破之斬馘三萬餘進

克錫山廣信江西肅清同治元年賊麇聚皖南楊秀清匿城中
洪容海繞城築壘三十餘里魏超成列隊胡蘆山超一戰卽破
黃文金於西河灣平八十餘壘皖南肅清會李秀成竄江西旋
遁入金陵超追破藍石德於曹塘斬級六千張勝祿殺藍石德
獻頭降復收建平鼓行壩楊柳谷率三萬衆降遂下東壩攻句
容斬馘七千城內亂夜縛項大英方成宗款營五萬餘衆盡降
戮項方於市引兵趨寶堰進克金壇常州時二年四月也江西
告急超馳救抵撫州破賊壘一百餘座斬首四萬級進克金溪
瀘溪南豐新城陳炳文張學明陶金曾等率衆七萬降是時江
寧已克論功加一等輕車都尉世職錫封一等子爵五年命勦

撚六年正月大破之光緒十四年終於家官至提督諡忠壯
石清吉字祥瑞直隸沙河人由武進士官侍衛咸豐三年討黃
陂勦崇陽四年勦應城均有功八年援蘄州援太湖馳壬慶壁
城東北蹙賊屢捷十一年安慶既克遂克桐城僞英王陳玉成
敗竄廬州死守不下同治六年援廬州玉成走死三年九月髮
逆陳得才馬融和大股擾蘄水關口公馳救血戰被九創遂陷
陣死官至參將諡威毅

舒景衡
續纂